

適園叢書

張宗祥



古泉山館金石文編殘稿卷三

唐

宮闈令西門珍墓志

右墓志首尾共三十二行正書字徑五分許志言珍京兆雲陽人曾祖名空而不書祖彭父進朝議郎行內給事賜緋魚袋珍至德初釋褐從仕大歷末擢居宣徽後除內府局丞充鳳翔隴右節度軍門判官德宗俾充荆襄沔鄂洪府宣慰使興元元年除洪州判官監先鋒貞元元年拜內僕令改豪壽觀察監軍判官又遷荆南監軍八年充劔南三川宣慰使又監淄青行營十三年歸闕復任高品順宗嗣位選爲少陽院五品永貞元年賜金魚袋充會仙院使元和元年改充十王

宅使七年充威遠軍使元和十二年卒年七十四其云建中四年王室多故涇源叛卒晝入犯門鑿輿西巡以避封豕攷新唐書德宗紀是年十月涇源節度使姚令言反犯京師帝如奉天志文云鳳翔隴右節度監軍判官時懷光不臣潛與泚合翠華於是更幸梁洋節度楚林果有疑貳公每於衙府輒肆直言諭其將士徼以禍福國家靡汙隴之憂州縣免誅夷之弊徼公之力殆不及此德宗聞而異之俾充荆襄沔鄂洪府宣慰使興元元年遂除洪府判官監先鋒攷本紀是時鳳翔節度朱泚亦繼反張鎰代爲節度其後營將李楚琳殺之自稱留後朱泚犯奉天禁軍敗興元元年二月李懷光爲太尉反丁卯帝如梁州三月壬辰次梁州五月李晟等屢敗

朱泚復京師六月姚令言朱泚皆伏誅改梁州爲興元府給  
復二年又給復洋州一年此其事也蓋珍卽爲張鎰監軍判  
官正與楚琳同事然張鎰傳言營將李楚琳嘗事朱泚得其  
軍心司馬齊映等謀曰楚琳必爲亂乃遣屯隴州楚琳知之  
稽故未行鎰以帝在外心憂惑謂已亟去不爲備楚琳夜率  
其黨作亂齊映自竄出齊抗託傭皆免鎰縋城走不及遠與  
二子爲候騎所執楚琳殺之絕無一言及珍又韋皋傳言德  
宗狩奉天李楚琳殺張鎰劫眾歸朱泚隴州刺史郝通奔降  
楚琳則楚琳後仍與朱泚爲亂珍有何功而志乃云國家靡  
泮隴之憂州縣免誅夷之弊微公之力殆不及此毋乃失之  
諛矣楚琳作楚林志與史異似當以志爲正洋州本析梁州置

境壤相連攷本紀言給復洋州一年而韋皋傳亦云帝在梁洋還則當時德宗必曾至洋州本紀既云二月丁卯如梁州不當於三月壬辰又言次梁州疑梁州之梁乃洋字之譌攷藩鎮表開元五年置隴右節度又上元元年置興鳳隴西節度建中四年賜號保義節度後吐蕃陷隴右貞元初置行秦州以刺史兼隴右經略使以鳳翔節度使領隴右支度營田觀察使志作於元和時故有鳳翔隴右節度之稱本紀又云建中四年九月舒王謨爲荆襄江西沔鄂洪州宣慰使及除洪府判官監先鋒蓋爲普王時間官也地理志云洪州豫章郡上都督府蓋普王之從府於洪州故稱洪府云又云兵馬使伊慎下安黃等州貞元元年來獻俘馘攷本紀貞元十五

年十一月安黃節度使伊慎敗吳少誠於鍾山十六年七月伊慎及吳少誠戰於申州敗之而其先克復獻俘事遺而未載志又云其年秋改充豪壽觀察監軍判官尋除張建封尙書爲徐泗節度詔公獨監送上職名如故者攷張建封傳建封爲壽州刺史李希烈僭天子位淮南節度陳少游陰附之約破壽州以趨江都建封堅壁據之賊不能東遷圍練使帝還自梁少游憂死進御史大夫濠壽廬觀察使繕陞治兵希烈使驃帥悍卒來戰建封皆沮劔之賊平進封階又任一子正員官貞元四年拜御史大夫徐泗濠節度使則珍爲豪壽觀察監軍判官卽爲張建封之屬官也前但云濠壽而無廬後但云徐泗而無濠濠字又作豪皆與史異攷唐書地理志

云濠州濠字初作豪元和三年改從濠此志刻於元和十三年而猶作豪者蓋西門君於元和元年後既營生壙卽屬王元佐撰刻此志乃卒後但續刻卒葬之事而未及追改豪爲濠也廣韻豪下云州名古鍾離國隋改爲州又大歷九年顏魯公干祿字書及韓昌黎集徐泗濠三州節度掌書記廳石記皆作濠州而通典謂隋改楚州曰濠州因濠水爲名唐初因之元和郡縣志亦云武德五年杜伏威附改濠州濠字中間誤去水元和三年又加水吳曾能改齋漫錄據杜氏之言駁洪慶善攷正韓集作濠之誤皆非是惟志又云遷荆南監軍未知其詳志又云八年充劍南西川節度使本紀貞元五年九月丙午劍南西川節度使韋皋敗吐蕃於臺登北谷克

嶺州又攷劍南節度於至德二載分西川東川是時西川而志作三川恐三乃西之誤岐山爲鳳翔府屬縣縣有岐山乃京畿近地珍所歷之官以百官志攷之內侍省有六局其一曰內府局有令二人丞二人掌中寶藏貨賄給納之數及供鐙燭湯沐張設凡朝會五品以上及有功將士蕃酋辭還皆賜於庭一曰內僕局亦有令丞各二人掌中宮車乘皇后出則令居左丞居右夾引又內侍省有高品一千六百九十六人品官白身二千九百三十一人又宮闈局亦內侍省六局之一有令丞各二人掌侍宮闈出入管籥又內給事十人掌承旨勞問分判省事凡元日冬至百官賀皇后則出入宣傳等然則珍係內侍省之宦官而其父之官爲內給事亦係內



侍之流矣少陽院會仙院皆不見於百官志而云順宗嗣位  
爰選耆德以輔儲皇轉爲少陽五品則知其爲東宮之官也  
十王宅者據長安志云改元先天之後皇子幼則居內東封  
後以年漸長成乃於安國寺東附苑城同爲大宅分院之名  
爲十王宅令中官押之於夾城中起居每日家令進膳十王  
謂慶忠棣鄂榮光儀穎永濟也志言內常侍正五品下內給  
事從五品下而太子有內方局令二人亦從五品下則此云  
少陽院五品者蓋東宮官之大者也惟其初官云擢居宣徽  
考宋時有宣徽南院使此院使掌總領內諸司及三班內侍  
之籍而於唐志未見豈吏之漏乎節度使有判官一人而所  
謂監軍宣慰使者屢見本紀及列傳亦不載於百官志蓋皆

行軍時差遣權置之名無定職也據志珍乃於生前建瑩域  
猶後人所云生壙也而文銘詞後續題其遷監威遠軍使及  
卒葬年月則此志實作於建域之時并卽於其時先爲勒石  
者故其首行官銜有磨改跡蓋以充威遠軍監軍六字添入  
文後有子四人四係三字磨改而其名季華季煜四字亦有  
磨改跡蓋少子亦係刻文之後所生故以其名補入耳惟此  
文題鄉貢進士王元佐上並非珍之同姓而稱從姪爲他刻  
所未見不可解也威遠軍亦不見於藩鎮表俟再攷之此墓  
志前輩皆未見恐係近來出土亦關中之物文云龍首原西  
距阿城東建營域攷長安志秦阿房宮一名阿城在長安縣  
西二十里後又云遷窆於長安縣承平鄉先修之塋長安志

古泉山...  
無承平鄉其所稱修德里蓋卽修德坊也長安志言在朱雀街之第三街卽皇城西之第一街第一坊也

韓文公祭湘君夫人文 元和十五年

韓文公祭湘君夫人文作於元和十五年十月其黃陵廟碑則在後一年長慶元年攷韓文類譜謂祭文卽刻於碑陰而集於祭文後依石本附四十二字云始將旣修樹舊碑仍刻其文於新石因銘其陰舊碑石旣多破落文不可盡識移之於新或失其真遂不復刻方崧卿韓文舉正云此蓋後人以碑本附入朱文公攷異云此必公所自記故石本有之案公稱舊碑卽晉太康時碑圖記誤爲漢劉景升立者公先作祭文有將求玉石仍刻舊文之語其後不果故復題記於後然

則祭文與此四十二字當並是長慶元年後刻也

著作郎韋端玄堂志

右韋端玄堂志首尾共二十七行行廿五字首二行擠而小  
勻正書字徑五分許文為端之子紆撰書其敘五代祖孝寬  
後周大司空鄭襄公高祖津隋民部尚書曾祖琬皇城州刺  
史贈禮部尚書祖季弼太僕寺主簿考廉尚書庫部郎中端  
為廉之第二子以新唐書宰相世系表攷之韋氏鄭公房叔  
裕字孝寬隋尚書令鄭襄公生六子陵州刺史壽光縣男津  
為叔裕第五子津第二子威州刺史琬琬第六子季弼季弼  
子靡考功員外郎端為靡之第二子端生二子縝紆表載廉  
官階皆與志不合自當以志為正表又誤廉為靡

今案及古閣本皆廉

不以尚書庫部郎中爲考功員外郎并闕端之官又端有五子止載纘紆而遺系練絢且據志言纘工部郎中系陽翟縣尉練鄉貢進士紆兼殿中侍御史絢前太廟齋郎而表皆無之孝寬周書及北史皆有傳傳言韋叔裕字孝寬京兆杜陵人少以字行以戰功歷官尚書右僕射拜大司空天和五年進爵鄖國公周宣帝崩隋文帝輔政發關中兵以孝寬爲元帥東伐關東悉平凱還京師薨年七十二贈十二州諸軍事雍州牧諡曰襄有六子總壽霽津知名據傳所言則孝寬之爲尚書令鄖襄公皆當在後周時與志所言合表屬之隋失其實矣此志不稱墓而稱玄堂爲自來墓志所未見澤化閣帖唐高宗敕亦有使至知玄堂已成之語想當時稱墓爲

玄堂猶滕公墓石之言佳城也或因其子所作不忍言墓故改稱玄堂耳志後言以貞元六年奉安宅兆至是蓋祔貞元六年在元和十五年前三十年乃謂葬其母王氏之年也志云淮夷削平之明年皇帝在宥天下方宏孝理詔百辟父母存有顯擢歿有哀贈時纘爲工部郎中由是拜公朝散大夫祕書省著作郎致仕以史攷之當是元和十二年十一月吳元濟伏誅之後也唐時恩例以子官而父存者雖以去官尙得遷轉超擢仍聽其致仕較後代僅得以子官封贈者爲更優文簡質無華書法亦秀雅前人未見箸錄當亦近年出土者長安志載洪固鄉在萬年縣南十五里管邨四十八

大唐涇王故妃韋氏墓志銘

右墓志首尾共十八行參差不齊首行廿二字正書字徑五分文爲張周撰攷涇王名佺肅宗之子本紀載至德二載十二月封子東陽郡王佺爲涇王亦見宗室世系表韋氏祖湜父昭訓並見宰相世系表乃郎王房之後表載湜齊州刺史昭訓太子僕墓志敘湜爲中散大夫潁王府司馬贈光祿卿與表異而昭訓贈衛尉卿表亦弗之及自當以墓志爲正德宗本紀載涇王卒於興元元年五月則妃薨時涇王尙在也志不書所葬之郡縣向來金石家皆未箸錄恐係新出土者予得之吳門碑估處察其紙墨似是關中搨手恐在陝西

黃陵廟碑

朱子韓文攷異附載石本與諸本異同於黃陵廟碑下云此

篇方從石本所稱方者方崧卿韓文舉正也予家有元刻朱文公校昌黎集併附王伯大音釋本所載與石本異者數字予生後歐趙諸公又數百年石本已不可得見據元集猶可約略知之

韓泰侍郎窾題名

右韓泰題名正書九行在永興縣泰字安平順宗朝王伾王叔文用事陰結天下名士泰與柳宗元劉禹錫等皆諂附之憲宗立皆貶謫遠州刺史稱泰有籌畫爲伾叔文所倚重能決大事以戶部郎中神策行營節度司馬貶虔州司馬終湖州刺史附見新唐書王伾傳其任漳郴睦三州刺史傳皆不載蓋略之也



修浯谿記

修浯谿記碑韋詞撰羅洎書共十六行每行三十三字正書  
浯谿諸題詠俱係磨厓鐫鑿獨此係另刻碑石嵌置厓壁觀  
其字跡不似唐時原刻疑後代好事者爲之其韋詞記後附  
元友讓題語題語之後始署書人羅洎姓名後又附元友讓  
復浯谿舊居五言律詩敘次無倫款式不雅可疑一也豆盧  
下空六字及相字下畢字上空六字語氣不相屬可疑二也  
又據韋詞記元友讓假道州長史維舟亭下在憲宗元和十  
三年春而友讓題語在敬宗寶歷元年上距已逾六年而云  
去年五月維舟於此可疑三也其記文云士林經過篇翰相  
屬今圻塤移舊手筆亡矣將編於左方用存此亭故事題語

云負罪奔迫不及題記故於簡餘書之細玩語意似記文爲友讓編集浯谿諸名人題詠成書而作並非專爲修復浯谿也種種可疑必非原刻碑後又有宋皇祐時人王仁壽篆書題名十九字亦不類爲游浯谿而題之語恐此碑卽其所刻至王侍郎昶爲傳未嘗有再臨道州之事攷元次山於代宗永泰中爲道州刺史先於肅宗上元間以水部員外郎佐荆南節度使呂諲府其時或曾經游歷浯谿亦未可定今縣志谿志俱改爲元公刺道州皆非是韋詞字踐之官至湖南觀察使見唐書宰相世系表楊於陵爲嶺南節度使辟詞與李翱在幕府咨訪得失見於陵傳又案舊唐書韋詞傳字踐之祖君今本誤卿洛陽丞父翊官至侍御史傳稱詞少以兩

經擢第判入等爲祕書省校書郎貞元末東都留守韋夏卿  
辟爲從事後累佐使府皆以參畫稱職元和九年自藍田令  
入拜御史以事累出爲朗州刺史再貶江州司馬長慶初韋  
處厚路隨素知詞有文學理行亟稱薦之擢爲戶部員外郎  
轉刑部郎中充京西北和籴使尋爲戶部郎中兼御史中丞  
充鹽鐵副使轉吏部郎中文宗卽位與翱同拜中書舍人出  
爲潭州刺史御史中丞湖南觀察使在鎮二年吏民稱治大  
和四年卒時年五十八贈右散騎常侍案其歷官年月約略  
與石刻合惟石刻云以恩例自道州司馬移佐江州則詞先  
爲道州司馬後改江州而傳不書者蓋以再貶二字括之也  
攷劉禹錫撰詞父翱墓志趙德甫金石錄跋之云翱有子詞

仕爲湖南觀察使舊史有傳而新史無之墓志云翊父卿而傳作君卿墓志云雄官殿中侍御史而傳作侍御史皆非也中澂案新史宰相世系表詞父名缺亦書其官爲侍御史又書其祖名幼卿今刻本誤作卿而非君卿官洛陽令而非丞與墓志舊史又多不合然表列幼卿之兄名幼成第一名幼奇一名幼章則似以幼字爲排行者恐舊史亦未盡得實今舊史刻本韋詞名誤作辭故金石粹編謂兩唐書皆無傳蓋偶未深攷耳唐制左遷謫降官授州刺史司馬者皆員外置詞以事貶爲此官故自署江州員外司馬蘇子瞻謫授黃州團練副使不得簽書公事其詩有俗客不妨員外置之句可見宋時亦沿其例云

皇甫湜活谿詩

活谿厓間有皇甫湜詩刻十二行每行十一字正書洪容齋陸放翁俱有題跋趙德甫金石錄亦載其目無年月容齋隨筆錄其全篇嘵素懶作揚素懶如有賴之賴作待與全唐詩同知全唐詩卽以洪爲藍本也石刻完好無缺中行下有小注蘇預二字金石萃編偶遺之又末題銜名下書字已漫漶細審石刻其下尙有小注數字亦磨滅僅存新元二字可辨活谿新志君可蓋作見冠蓋一氣閒作兩氣閒皆非是

李諒湘中紀行詩

李諒湘中紀行詩二十行行十三字正書左行述葦侍郎金石萃編所載闕十五字又谿渤之渤誤作勒積翠之翠誤作

學蓋搨本未精之故子游浯谿親督搨工椎打所謂闕泐者一一皆可辨識乃爲補之中云唐亭仰文唐亭字並不作頤此唐人手筆可見次山當時本用亭字也

聚慶墓志

右志文十三行首三行皆十九字餘參差不等正書字徑七八分文言勒石其實以方塶刻之行間有細線爲界塶藏張叔未齋己亥三月予由嘉興往杭州便道訪叔未於新篁里出此志相賞因手搨其文攜歸補錄入之志雖無書人姓名而字體工整古雅勁脫猶具唐人書家矩矱且無一字漫漶尤難得也叔未言志於三十年前出秀水縣螺潭廟側田中予攷秀水縣乃明宣德中分嘉興縣地置嘉興本漢縣屬會

稽郡東漢屬吳郡唐屬蘇州石晉天福四年置秀州宋改屬

秀州又改陞秀州爲嘉興府自後嘉興縣皆屬嘉興府太平

寰宇記云嘉興縣舊五十鄉今四十二鄉因割八鄉置崇德縣故也此志

言終蘇州嘉興縣進思鄉又言封當縣南甘露鄉崇福里蓋

皆宋以前五十鄉中之二鄉舊名也又攷說文木部榧木薪

也而廣韻十八尤旣收榧字又別出聚字引字統云姓也則

正與聚府君之姓合且攷毛詩聚子內史亦作聚鄭箋謂聚

爲氏可知聚姓已見於三代矣說文所收之字亦有以偏旁

在下在右分作兩字者如言部謀誓二字之類豈聚字爲後人誤刪邪

據此志唐時尙有聚姓廣韻又明引字統與榧字分作二體

而今韻書但有榧而無聚又不知刪於何人可知後代增加

之字固不少於經典相承之古字反遺而刪去者亦多矣志稱聚府君馮翊人蓋書其舊望也文云扶疾問於筮兆疾見廣韻五支云疾也筮乃筮之別體說文筮字作籒从古文巫登封令崔蕃墓志

右墓志二十九行行三十字正書字徑四五分石缺去後下角二十餘字志言父澣少府監贈散騎常侍又云公卽右貂之仲子也攷唐書百官志少府監從三品左右散騎常侍正三品注云隸門下省皆金蟬珥貂澣贈散騎常侍故有右貂之稱又云德宗韋賢妃公之從母也則蕃母乃韋氏矣韋賢妃見唐書后妃傳志文後有博齊與公少相狎長相愛之語則銘末下題嵩陽隱士趙博之下必是齊字蓋文爲趙博齊



所撰也蕃卒於登封任所而云歸葬於京兆■縣先塋則此志亦當出於關中蕃家京兆而志言魏郡博陵人者舉其望也

宣功參軍魏邈妻趙氏墓志

右墓志王儔撰道光戊子三月予自吳門碑估處購得文中次任婺州司功參軍次任宣州司功參軍十六字脫而補刻於旁攷魏姓本周武王弟畢公高之後畢萬仕晉封於魏因以爲氏廣韻云出鉅鹿任城二望今此志引世本秦改魏爲鉅鹿郡又云後徙家於山南今則洋州興道人是魏邈之望出於鉅鹿也又云國命良相諡曰文貞公者即太宗時相魏徵也志首題云宣公參軍者即宣州司功參軍也邈於元和

九年十月卒於宣州司功參軍之任於元和十年十月歸葬  
萬年縣洪固鄉北韋村後至會昌四年十一月其妻趙氏歿  
於延州豐林縣於五年十一月祔葬北韋村王儔始爲作志  
銘志敘其四女於三子之前或因女皆先生長於其子也而  
又贊美其女至三四言之多可謂允蕪無識殊失行文之體  
矣志文不足取而字頗渾厚圓勁惜無書人姓名此刻世本  
之世及二民字皆避諱闕筆參閱之參與參軍之參皆作叅  
是唐人讀曾子之名與參軍同矣此與元和十五年韋端志  
皆云葬萬年縣洪固鄉而前人未有箸錄者蓋皆近日土人  
發掘得之始傳於世也長安志載萬年縣洪固鄉管村四十  
八此北韋村蓋其一也

裴■等西谿題名

右裴■等題名正書七行左行在衡州府城外石鼓山厓壁  
裴下闕其名案裴刺史衡州府志職官未載無可攷

李坦華嚴巖題名

李坦題名正書四行零陵縣志坦誤垣

盧鈞浯谿題名

盧鈞題名正書三行左行在浯谿王軒等題名之下案鈞字  
子和系出范陽徙京兆藍田舉進士第以拔萃補祕書正字  
累官至宣宗朝遷檢校司空太子少師封范陽公節度河東  
大中九年召爲左僕射罷以檢校司空守太子太師又同中  
書門下平章事又爲山南西道節度使俄檢校司徒爲東都

留守懿宗初復節度宣武辭不拜以太保致仕卒年八十七  
贈太傅諡曰元見唐書本傳傳稱鈞與人交始若淡泊既久  
乃益固所居官必有績大抵根仁恕至誠而施於事玩服不  
爲鮮明將相沒而無贏財又敘其官嶺南節度使時諸善政  
時稱廉淑南方服其德不懲而化又除采金稅華蠻數千走  
闕下請爲立生祠刻石頌德鈞固辭以戶部侍郎召判戶部  
此題名蓋其自嶺南赴闕路經浯谿時筆也

馬植浯谿題名

馬植題名正書三行左行在浯谿盧鈞題名後案馬植唐書  
有傳云字存之鳳州刺史勛子也第進士又擢制策科校書  
郎歷官至戶部侍郎同中書門下平章事進中書侍郎又罷

爲天平軍節度使貶常州刺史以太子賓客分司東都起爲忠武宣武節度使卒傳稱其開成初爲安南都護精吏事以文雅絢飾其政清淨不煩洞夷便安羈縻諸首領皆來納款遣子請賦和約束植奏以武陵縣爲陸州卽東首領爲刺史旣而州部廢池珠復生以政最檢校左散騎常侍徙黔中觀察使會昌中召拜光祿卿此蓋植自安南赴黔道經浯谿時所題傳云觀察等使兼刺史也

房魯浯谿題名

房魯題名正書三行左行在浯谿李行修題名下攷魯字詠歸係太宗朝名相房文公元齡七世孫見唐書宰相世系表題云昌五申冬者蓋會昌五年十一月也浯谿新志不知房

魯昌五之義改作房州魯昌五又於來下增此字又以上王  
軒等題名大和五年係於其前錯繆殊甚

盧貞浯谿題名

十駕齋養新錄云盧貞字子蒙會昌五年爲河南尹白樂天  
九老會貞年未七十亦預焉時又有內供奉盧貞見唐詩紀  
事是唐有兩盧貞此題名之盧貞恐是九老會中人也

韋瓘浯谿題名

浯谿有唐韋瓘題名十八行每行十字正書容齋四筆跋此  
刻撮其大略書之文句多有刪削且後半竟未及一語蓋其  
時字已漫漶不可讀矣容齋去今又數百年前半又缺十八  
字賴跋語可以補之然非石刻尙存亦無從知容齋有刪削

也今以石刻校之二年下有十二月七日五字刺史下尚有八字不可辨者五字桂林之命下尚有十七字不可辨者十一字纔經數月下尚有四字不可辨者三字容齋所引止於誠為忝幸句以下尚有七十五字可辨者僅四十八字耳今據欽定全唐文補足二十七字後半乃成完璧矣攷攷字茂宏及進士第新唐書附韋夏卿傳後史稱其會昌末累遷楚州刺史今據其自述乃在大中元年史亦未得其實

李行脩浯谿題名

鳳貞... 會昌五年... 南... 日... 天

右李行脩等題名正書四行左行在馬植題名之下李行脩署銜云廣州刺史而下有掌書記施肱巡官李黨二人姓名攷唐書百官志天下兵馬元帥其屬有掌書記又團練使防

禦使皆有巡官惟節度使觀察使俱有掌書記巡官各一人至諸州刺史並無置掌書記巡官之文然攷唐武德初邊要之地置總管後改曰都督又兼刺史又或領兼防禦團練使又其後節度觀察防禦團練等使皆兼所治州刺史據地志云嶺南道廣州南海郡中都督府蓋廣州本係邊要之地以都督兼刺史都督亦無置書記巡官之制蓋因其時刺史多有以節度觀察等使兼領者皆置此二官因而都督亦置矣此亦唐末方鎮擅權之漸也

唐王軒等浯溪題名

王軒等題名三名篆書年月一行正書在浯溪李行修題名之下攷唐范攄雲溪友議載王軒游西江泊舟苧蘿山下題



西施石事謂軒少爲詩頗有才氣全唐詩采其事云大和中  
進士案之時代正與此合恐卽其人也

宋祝侍郎竅題名

右宋祝題名正書三行在永興縣

武元衡桃源洞詩碑

桃源洞有武元衡絕句一碑行書三行每行十一字字大四  
寸許筆力遒勁丰神秀逸似非後代人筆而不書年月攷武  
元衡字伯蒼曾祖載德則天皇后之族弟元衡舉進士累爲  
華原令未幾移疾去德宗欽其才召拜比部員外郎後擢至  
御史中丞常對延英帝目送之曰是真宰相器憲宗元和二  
年拜門下侍郎同中書門下平章事兼判戶部事後以蜀新

定詔以檢校吏部尙書兼門下侍郎同平章事爲劍南西州節度使繇蕭縣伯封臨淮郡公八年召還秉政後爲怨家王承宗使盜殺害贈司徒諡曰忠愍見新唐書本傳全唐詩載此詩漁郎誤作阮郎題作同苗郎中送嚴侍御赴黔中因訪仙源之事

李羣玉桃源洞詩碑

李羣玉桃源洞絕句一首刻石洞中行款字數大小與武元衡詩同惟行書筆畫較肥少遜武碑之挺秀攷方輿勝覽列李羣玉於澧州人物云裴休入相以詩薦之遂授校書郎全唐詩錄其詩三卷云字文山澧州人此詩在其內標題云桃

源

淳谿谿園二字

篆書橫刻小晤臺南石堂下小石上字徑六寸許筆法深穩唐人筆也

淳谿石門二字

在東厓下左石上字大一尺五寸按元次山淳谿銘有山開石門之句則石門二字當是唐以前刻

窪尊二字

石鼓山西谿厓下丞水岸邊有巨石一四方約二尺強一面刻正書窪尊二字徑尺許筆法古勁疑是唐人手筆其一面爲宋治平乙巳河東薛侔題名攷窪窠二字並見說文元次山所銘之尊本在道州係我家令問公篆書至今尙存其字

作窳然趙德甫金石錄目載唐李氏窳尊銘及東坡武昌西山詩序云鄧聖求刻元次山窳尊銘又山谷詩江南石上對窳尊之句竝作窳則令問公作籀篆書用窳字安知元公非本用窳字邪又按范石湖游石鼓山記云石鼓書院台江亭今綠淨閣西廊外石磴緣山謂之西谿有窳尊及唐李吉甫齊映諸題名石湖所謂窳尊者疑卽指此二字也

浯谿殘題名

浯谿中興頌石刻之前有正書殘題名三行第一行二人第二行四人第三行亦二人上下及前俱殘缺無字其後卽刻浯谿銘正書釋文按浯谿舊有杜傑杜貞元十八年三月題名今搜拓未見而此刻有傑杜例未知卽一刻否

周

石屋洞題名

道光丙申孟秋復游吳門小住城東亦陶弟家廿七日初之  
仁兄過訪出此石屋洞題名共賞曩曾於六舟達受上人處  
見之忽忽已數年矣茲復細讀於初老所錄跋語中尙有當  
時官位之人所未舉者如西關巡檢將兼知鎮務及左軍兵  
馬使中直左上押衙中直都副將管軍廂虞候安邦佐治勤  
王云云金馬都副將閣門承旨朝散大夫守尙書刑部侍郎  
翰林院副知兼侍御史等署官皆可證補吳氏十國春秋所  
未詳備者此石刻之所以可貴也

南漢

崇福寺銅鐘款

南漢大寶四年鐘在桂陽州城隍廟中其文陰款正書六行  
字徑四五分學使徐星伯編修訪得之以拓本貽余以史攷  
之桂陽郡本漢置唐改爲郴州屬江南道地理志云郴州桂  
陽郡有桂陽監食貨志謂唐自武德四年諸州始置監鑄錢  
至天寶中役用減而鼓鑄多天下鑪九十九而郴有五至貞  
元二十年李巽以郴州平陽銅坑二百八十餘復置桂陽監  
以兩鑪日鑄錢二十萬此桂陽監之所由昉也以今地理言  
之郴與桂陽二州自漢暨唐皆郴州桂陽郡之地昭宗乾寧  
三年馬殷爲潭州刺史遣其將秦彥暉等攻下連邵郴衡道  
永六州自是郴始屬馬殷爲楚地三傳至馬希廣爲其兄希

芻所殺自立南漢劉晟先遣使聘楚求婚不許遂乘亂攻之  
乾和九年遣內侍潘崇徽攻取郴州自後郴又屬之南漢至  
宋太祖開寶四年始得其地後以郴桂陽宜章永興寧桂  
東六縣爲郴州分平陽藍山臨武三縣卽桂陽監置桂陽軍  
卽今之桂陽州也今之湖南省惟郴與桂陽二州曾隸南漢  
版圖所謂領南北十州之一耳餘皆楚馬氏之地後爲周行  
逢所據於建隆四年歸併於宋者此鐘今在桂陽州其款不  
稱郴州桂陽郡而稱桂陽監并有次及坑鑪民庶之詞可知  
其地卽係當時設監之所矣大寶四年卽宋太祖建隆二年  
係劉晟之子鋹卽位改元之四年距攻取郴州已隔十年又  
十年而南漢始亡於宋星伯聞之土人云此鐘自他處移來

崇福寺今已不知其遺址矣

宋

儀制令碑

長沙縣霧陽鄉田閒有一碑上題儀制令大陽堠正書六大  
字作二行字徑七八寸下刻小正書約五行字徑寸七八分  
前二行云賤避貴少避長輕避重去避來每行六字後有一  
行磨滅不可辨又後一行下存縣尉二字又後一行下存縣  
尉吳三字餘皆漫漶未見年月攷宋史孔承恭傳云嘗疏請  
令州縣長吏詢訪耆老求知民間疾苦吏治得失及舉令文  
賤避貴少避長輕避重去避來請詔京邑并諸州於要害處  
設木牌刻其字違者論如律上皆爲行之則賤避貴云云四



句本係宋初令文碑所題儀制令是也惟傳言設木牌刻其字而據事物紀原則云刻石其說互異今石碑見存豈史傳有誤歟

李建中澹山巖詩

李建中京兆人見宋史文苑傳太宗太平興國八年進士甲科釋褐大理評事歷官至工部郎中判太府寺眞宗大中祥符六年卒年六十九傳稱其幼好學蜀平侍母居洛陽聚學以自給攜文游京師爲王祐所延譽性簡靜風神雅秀恬於榮利前後三求掌西京留司御史臺尤愛洛中風土就構園池號曰靜居好吟詠每游山水多留題自稱巖夫民伯善書札行筆尤工多構新體草隸篆籀八分亦妙人多摹習爭取

以爲楷法嘗手寫郭忠恕汗簡集以獻皆科斗文字有詔嘉  
獎好古勤學多藏古器名畫有集三十卷傳又言建中以大  
理評事出爲岳州錄事參軍再遷著作佐郎監潭州茶場改  
殿中丞歷通判道郢二州轉太常博士攷其時當俱在太宗  
朝得中久宦荆南宜涪谿亦有詩刻惜余游涪谿搜求未得  
耳

徐陟華巖巖題名

徐陟題名正書四行省縣志誤作丞

盧察題涪谿詩

右盧察詩正書九行在磨厓碑之顛岵臺之左前人未見

盧察再題涪谿詩

右盧察再題浯谿詩正書五行不齊在嵒臺左前人未見

集賢章岷詩

按章岷字伯鎮登天聖五年進士嘗爲平江軍推官文聲甚著范文正公有和章岷從事鬪茶歌及同登承天寺竹閣詩見中吳紀聞孫沔字元規會稽人以祕書丞爲監察御史襄行景祐元年冬至日冊后沔奏非制又同安縣尉李安世上書指切朝政被劾奏請勿治黜知衡山縣又上書言時事再貶永州監酒見宋史本傳

陳統浯谿詩

陳統詩正書十七行字數不齊在磨厓壁閒浯谿新志遺去前一首而以後次山舊隱一詩屬之書人鄭紘謬甚又羣山

合作羣山在皆當以石刻正之

宋宣獻詩

宋宣獻宋綬也宋史有傳大中祥符元年賜同進士出身仁宗朝官至參知政事卒贈司徒兼侍中謚宣獻攷宋人推當代書家每以綬與李西臺並稱又史傳稱其幼聰警額有奇骨爲外祖楊徽之所器愛徽之無子家藏書悉與綬綬母亦知書每躬自訓教以故博通經史百家文章爲一時所尙徽之卒遺奏補太常寺太祝年十五召試中書真宗愛其文遷大理評事聽於祕閣讀書又云綬性孝謹清介言動有常爲兒童時手不執錢家藏書萬餘卷親自校讎其筆札尤精妙朝廷大議論多所裁定楊億稱其文沈壯凜麗及卒帝多取

其書字藏禁中則此刻其亦金石中之特健藥歟傳不詳其卒年以宰輔表攷之當在康定中

釋迦文佛四大字

曼卿與范文正公歐陽文忠公文忠公稱其工於書筆畫遒勁體兼顏柳又王直方詩話云曼卿以書名世然大字愈妙嘗讀龜山寺三佛名榜最爲雄偉張文潛有詩云煌煌三佛榜鐵貫金石紐開張宮室正渾寶山岳厚井水駭龍跽蟻封觀驥驟真能道盡其妙余攷曼卿書惟長城葆光等題名刻於汴都者今廣西龍隱洞有慶元中重摹本不知何以得至南嶽有此書也曼卿名延年卒於康定二年宋史作幽州人蓋本歐陽公所撰墓表東都事略則云宋城人

岳陽樓記

蘇子美名舜欽舉進士歷官集賢校理監進奏院被劾除名  
又得湖州長史卒宋史文苑有傳稱其少慷慨有大志狀貌  
怪偉當天聖中學者爲文多病偶對獨舜欽與河南穆修好  
爲古文歌詩一時豪傑多從之游又云數上書論朝廷事在  
蘇州買水石作滄浪亭並讀書發憤懣於歌詩其體豪放往  
往驚人善草書每酒酣落筆爭爲人所傳兄舜元字才翁爲  
人精悍任氣節爲歌詩亦豪健尤善草書舜欽不能及官至  
尚書度支員外郎三司度支判官邵餗號谿齋又號沖素處  
士隱居不仕與弟龍圖閣學士餗並以篆書名於時范文正  
謫守桐廬築堂於嚴子陵釣臺作客星祠記以書求餗作篆

稱其篆高出四海見寶真齋法書贊滕宗諒知虢州徙岳州見宋史本傳不言其至岳州歲月據此記知在慶歷四年

王恣曷浯谿題刻

右古篆一行刻於修復浯谿記元友讓詩碑後仁古文作恣从于心疇篆文作疇或作曷並見說文因古文國古文四聲韻云出義雲章然以仁疇爲名文義似不相屬或因疇字从壽作曷竟借爲壽字亦未可知

狄青浯谿題名

右狄青題名正書五行在浯谿磨厓右攷廣源州蠻儂智高於皇祐四年四月反五月陷邕州及橫貴等八州圍廣州嶺外騷動楊旼安撫久無功乃命孫沔余靖等討賊仁宗猶以

爲憂時狄青以彰化軍節度使知延州權樞密副使上表請  
行乃改宣徽南院使宣撫荆湖南北路經制廣南盜賊事置  
酒垂拱殿以遣之時智高還據邕州青出奇兵大敗智高遂  
遁去復爲樞密副使遷護國軍節度使河中尹還至京師帝  
嘉其功拜樞密使事詳宋史及東都事略今廣西臨桂有大  
宋平蠻碑及平蠻三將題名皆其事也據三將題名青以皇  
祐五年正月破賊二月班師至桂林詔換河中旌節召還樞  
密與此云季春朔凱旋過此正合後有武緯馮炳二人銜名  
並云掌機宜宋制招討使得奏辟隨軍書寫機宜文字此青  
之從官也亦見三將題名儂智高者平蠻碑云賊之巢穴日  
廣州交阯之附庸也父爲交阯所戮遂棄其州奔南蠻界



中僭號自名其居曰雲南道又曰南天國再名其年曰景瑞  
曰啟歷云

高滌朝陽巖題名

高滌等題名正書八行在朝陽巖

柳拱辰等浯谿題名

浯谿東厓有柳拱辰等題名正書五行字徑二寸許方輿勝  
覽云柳拱辰其先青州人五季避地荆楚爲武陵之青陵人  
年六十卽有挂冠之志剏亭於青陵館名橋曰歸老按曾鞏  
元豐類藁有歸老橋記爲拱辰作也洪邁容齋五筆謂拱辰  
以天聖八年王拱辰榜登科殆應辰之兄明統志載拱辰通  
判鄂岳州有惠愛弟應辰子平猷等相繼擢第人號武陵五

柳容齋五筆又載蔣世基述夢記云至和三年八月知永州職方員外郎柳拱辰受代歸闕祁陽令齊術行至白水夢一儒衣冠者曰我元結也今柳公游浯谿無詩而去予盍求之覺而心異之遂獻一詩柳依韻而和云云今拱辰詩未見僅於石門西北面尙存銜名二行其前已爲後人磨去改刻或卽詩之結尾歟皇祐六年卽至和元年是年三月始改元題名刻於正月故稱皇祐六年拱辰尙有至和二年六月澹山巖題名九月朝陽巖題名十一月華巖巖題名又三年二月建柳子厚祠堂俱在永所作則八月去官之說是也同游者有祁陽縣令齊術亦與述夢記合術平樂人皇祐五年宰祁陽期月建三絕堂於浯谿孫適爲之記殆亦風雅好事居官

而知所先務者也周世南祁陽人登大申祥符元年進士曾以虞部員外郎知郴州此題名銜云尙書駕部郎中分司後又有詩一首署銜與題名同而改分司爲致仕攷分司致仕者例得從便居住則分司猶致仕也時世南辭官家居與守令同游而列銜在邑令之上可見宋時鄉宦之重縣志謂世南篤學有氣節以持議忤王欽若致仕又載其遺事云少聘董氏女未婚喪明登第女父請改婚父貽書問之世南曰人生偶配有定分始全終廢天也卒娶瞽女爲婦士論高之則世南固亦卓然樹望於搢紳中者

柳拱辰浯谿殘題名

右柳拱辰浯谿題名正書一行在石門西北面石上

周世南題浯谿詩

右周世南詩正書十行在石門西石上後二行已漫漶末句爲人磨去改刻僅存末二行浯谿新志未載

徐彥君浯谿題刻

浯谿有鏡石祁陽縣志浯谿志俱載之攷孫適三絕堂記云旁有徐彥君題石水發其光洞鑒百里東皋雜錄亦云中興頌刻南崖石鑑江之南北數里草木人物毫髮畢見僧云昔有人鑿取去已行數驛夢山神追取卽載還龕置崖土但方二尺許爾余偶命從者洗其旁二丈餘皆光瑩可鑑僧驚云未見也又漁隱叢話云吾鄉乳谿有石厓亦光能鑒物與浯谿厓石政相類人因呼爲石照蘇黃門嘗題詩云雲開石照

政新磨烏度猿攀野老過忽見塵容應笑我年來底事白鬚  
多據此知浯谿鏡石在宋時已盛傳於世矣此石上蓋有徐  
彥君題名作志者未及細攷而遺之也彥君不知何時人余  
游浯谿土人導余觀鏡石並不見有彥君字蹟石光亦不甚  
清透李蔚浯谿志謂乾隆戊寅爲竊竈者損裂別以一石補  
之乃知今所存者已非宋時舊物而彥君姓名手蹟因此遺  
佚惜哉宋人避國諱嫌名鏡字皆改作鑑或作照石鏡縣改  
作石照縣湖州石家鏡子俱名爲照子故胡仔呼其鄉乳谿  
石鏡及蘇子由題石鏡皆作石照

柳拱辰等澹山巖題名

澹山巖至和二年六月柳拱辰題名有信安進士趙揚按王

安石廣西轉運使蘇安世墓志云女適單州魚臺縣尉江山  
趙揚攷衢州唐宋皆稱信安郡西安江山則皆衢之屬縣也  
揚後官荆湖南路轉運判官見宋史南蠻傳亦有題名見後  
又自稱會稽趙揚

潘夙浥谿題名

潘夙題名正書四行在浥谿崖上攷宋史潘夙字伯恭鄭王  
美從孫也有天聖中上書論時政授仁壽主簿歷知韶州擢  
江西轉運判官提點廣西湖北刑獄遷轉運使徙知滑州改  
湖北轉運使知桂州謫監隨州酒稅起知光化軍易端州刺  
史再遷鄜州召對稱旨還司封郎中直昭文館復知桂州徙  
河北轉運使歷度支鹽鐵副使知河中府又嘗知潭州再遷

光祿卿知荆南鄂州卒年七十題名云新江東提點刑獄乃  
新除江南東路之提點刑獄而傳未之及丙申爲嘉祐元年  
卽至和三年也是年九月改元嘉祐夙題名不書至和而書  
嘉祐當在九月以後此刻前人未見

俞洵直浯谿題名

右俞洵直題名正書六行左行在晤臺左

米君平等浯谿題名

右米君平等題名正書五行在晤臺左前人未見

余靖浯谿題名

余靖題名正書四行左行在浯谿磨厓石庚子乃嘉祐五年  
攷宋史是時交趾與甲峯蠻合兵寇邊又蘇茂州蠻寇邕州

乃以靖按撫廣西先是儂智高反靖方丁父憂卽喪次起爲  
祕書監知潭州詔委經制廣南西路儂寇平遷給事中御史  
梁蒨言賞薄又遷尙書工部侍郎狄青及諸將班師獨留靖  
廣西禽智高母子弟致闕下加集賢院學士故題名云再授  
命也史言遷工部侍郎而此云吏部殆其後又轉此官而史  
未詳及也廣西臨桂有靖嘉祐五年晦日題名署銜稱廣南  
西路體量按撫使副此無副字殆亦後來轉官吏亦未詳其  
廣西事旋之歲月據此可以知之此刻前人未有著錄者又  
陸詵澹山巖題名

陸詵澹山巖題名中之仙姑當卽元祐辛未高公傑題名所  
云何仙姑也歐陽公劉貢父皆紀何仙姑知謝仙火事當時



信爲真仙然貢父爲謝仙火乃南方賈人自刻姓名紀其物  
歐公謂仙姑晚年羸瘦皴黑第一衰嫗又云死後都無神異  
二公乃博達有識之儒故能不爲世俗所惑而辨其繆觀詵  
以轉運使按部游此攜家人與仙姑同至及高公傑宿何氏  
仙姑家覽仙姑得道處之語則知今傳奇中以何仙姑列於  
八洞神仙中其來有自也金石萃編以詵按部游此爲至邕  
州時非是

馮璟等澹山巖題名

蕭固亦新喻人見宋史李師中傳王安石爲撰墓志固凡三  
知桂州今廣西臨桂有嘉祐三年七月題名乃其最後知桂  
州時也後值申紹泰反貶官則嘉祐五年事此題辛丑爲嘉

祐六年蓋固去廣西任歸經此而題者

宋俞希孟澹山巖詩刻

澹山巖俞希孟三巖詩首有范陽同年示及零陵三題率然  
爲答甚媿妍唱云云十八字金石萃編脫去其云范陽同年  
者卽前盧臧也

楊冀浯谿詩

右楊冀詩正書七行左行在浯谿厓上前人未見楊冀衡州  
府志遺載

宋迪澹山巖題名

澹山巖有嘉祐八年宋迪題名攷迪字復古雒陽人與兄道  
字公達皆以進士擢第並處曹郎悉善畫山水師李成運思

高妙筆墨清潤當時以爲祕重又善畫松或高或臥或孤或雙至於千萬株森然殊可駭見宋郭若虛圖畫見聞志及元夏文彥圖繪寶鑑瀟湘八景之名蓋始於唐末五代米元章謂李營工已有圖據事實類苑云度支員外郎宋迪善爲平遠山水其得意者有平沙落鴈遠浦歸帆山市晴巒江天暮雪洞庭秋月瀟湘夜雨煙寺晚鐘漁邨落照謂之八景好事者多傳之與沈括夢谿筆談所載略同又湘山野錄謂長沙八景臺宋迪度支工畫有平沙落鴈等名謂之八景僧惠洪各賦詩於左則又似此圖名目實始於迪蓋八景圖正迪官荆南轉運判官時作而湖南舊志職官無其姓名故爲表而出之

嘉祐八年浯谿詩

右嘉祐八年詩正書八行在唐亭東厓下方石之北面其東面卽黃山谷與長老新公石刻後四行字較小上數字爲一大樹旁石壓掩不可見此刻前人未收錄

辭俅等石鼓山題名

右辭俅題名正書八行在西谿下河濱一方石上其一面卽刻窪尊二字志云在厓背誤也據澹山巖題名俅時官荆南轉運使當是按部至此也夏噩池州人曾以試光祿寺丞知長洲見姑蘇志宦績傳此題名自署會稽未知卽其人否張公紀係二名清泉縣志作張紀似誤又中元誤作上元未脫石字據石刻瞻會下尙有三字磨滅不可辨矣

薛球澹山巖題名

宋至道三年分天下爲十五路天聖中析爲十八元豐又析爲二十三其時荆湖又分爲南北路置轉運使攷王存九域志南路爲潭衡道永郴邵等州及桂陽監當卽此題名所云上六州一監也

梁宏等朝陽巖題名

梁宏等題名在朝陽巖正書五行

施■■■■ 悟谿題名

右施■■■■ 題名正書六行在悟谿石壁前人未見

沈紳悟谿題名

右沈紳題名八分書八行在悟谿崖壁

鞠拯等朝陽巖題名

鞠拯等朝陽巖題名正書五行

拙賦碑

道州有濂谿先生拙賦碑八分書分刻二碑各四行以格古  
要論攷之當是向子廓書而無姓名亦無趙師俠跋語及刻  
碑年月豈搨工遺之邪天下金石志云在岳州府恐誤攷大  
全集朱子漳熙己亥守南康有書濂谿先生拙賦後云右濂  
谿先生所爲賦篇聞之其曾孫直卿云近歲耕者得之谿上  
之田閒已斷裂然尙可讀也熹惟此邦雖陋然往歲先生嘗  
辱臨之乃闢江東道院之東榜以拙齋而刻置焉旣以自警  
且以告後之君子俾無蹈先生之所恥者以病其民云是拙

賦在宋時江西有兩刻矣己亥乃淳熙之六年戊申則十五年也是趙師俠刻本最後

愛蓮說碑

道州有愛蓮說碑八分書七行無書人姓名及刊刻時代攷朱子愛蓮說記云先生嘗以愛蓮名其居之堂而爲是說以刻焉又云曾先生曾孫直卿來自九江以此說之墨本爲贈乃復寓其名於後圃臨池之館而刻其說置壁間是濂谿此文宋時一刻於九江再刻於南康道州此碑蓋近人所摹未知出於何本

曼卿等浯谿題名

曼卿等題名正書六行在浯谿崖上前人未見

毛抗浯谿詩

右毛抗詩正書十一行在磨厓趙楷詩後毛抗浯谿新志誤作吳杭僻南地作在僻地自爾作自是皆當正之

宋昭邈等浯谿題名

右宋昭邈等題名正書五行在磨厓左李公度浯谿新志誤作李公波

柳應辰等浯谿題名

右柳應辰題名正書五行在石門西

右柳應辰題名正書五行在大押字後其末亦有柳公小押

字與大押字同疑後之好事者仿刻也



蔚宗浯谿題名

蔚宗題名正書六行在浯谿磨厓左蔚宗者關杞也米南宮海岳名言云關杞嘗謂余曰昔越州一寺修佛殿於梁栢內藏一函古模數十本所可記者王右軍十七帖虞世南枕臥帖皆有諸氏圖書印又云關蔚宗金陵幔山樓題乃二十年前書想六朝宮殿榜皆如是又陳眉公太平清話云關蔚宗景仁弟廬州使君也平生好事多蓄書畫游官交廣則蔚宗蓋嗜古博雅士也攷蔚宗於熙寧六年官廣西提舉常平見臨桂龍隱巖題名乃在此題名之前一年又澹山巖有七年正月十九日題名著銜稱前提舉廣西常平太常丞則與此刻同年月蓋是時杞由廣西提舉常平內遷太常丞還朝道

經此所題耳又宋史南蠻傳云元豐三年知邵州關杞請於  
徽誠州融嶺擇要害地築城砦以絕邊患詔湖南安撫使謝  
景溫轉運使朱初平判官趙揚商度以聞景溫等以爲宜如  
杞言則蔚宗又嘗官荆南而有政績者俱宜表而出之  
熙寧七年浯谿詩

右熙寧七年詩正書在心記之後其前爲近人磨去改刻姓  
名已無攷僅存後二十行此刻前人未見  
楊巨卿等澹山巖題名  
泚卽酒字酉字古文作𠂔故从酉之字用此其義可通

柳應辰浯谿押字題記詩

右柳應辰押字并詩押字長徑八尺彊深二寸許題字及詩

正書十八行在磨厓碑右容齋四筆載柳明明詩此處作此地向後有人作自有後人似當以石刻爲正

米黻浯谿詩

右米黻詩行書九行在磨厓左韋瓘題名下恰乃憐之俗字元章書之可見俗字有相沿已久者書家不究六書雖顏魯公書碑尙有繆體所謂羲之下筆卽俗字非苛語也

丁僑浯谿題名

浯谿有丁僑題名正書九行前人未著錄首題■寧五年云云寧上一字已殘缺攷熙寧七年柳應辰澹山巖記略云澹山巖中貯御書歲度僧一人僧惟利居處之便而不顧蔽障邊之弊冀穢積聚煙爨熏烝道隧陰黑非秉炬不能入太

守丁公僑處事剛嚴始至大不懌悉撤羣僧之舍俾居巖外  
他日公率應辰大理寺丞楊傑河陽節度推官楊巨卿同至  
游覽層構一空眾狀在目實人情之共快云云乃知僑亦風  
雅好事之賢守也題名首云五年閏七月五日到任八年  
月初八日得替十日早到浯谿後署銜云尙書虞部郎中  
前知軍州事蓋僑於熙寧八年罷知永州後游此寧土缺者  
當是熙字蘇詩云金谷草巖以蘇詩音風之類之音史判官  
義塾碑蘇詩云金谷草巖以蘇詩音風之類之音史判官

攷宋有兩王雱十駕齋養新錄云十字元澤安石之子附安  
石傳十澤州人雲之弟官右奉議郎見繫年錄余按宋史王  
安石傳安石於熙寧八年二月復相因進王經義成加尙書

百五十五卷之三  
三  
左僕射兼門下侍郎以雋爲龍圖閣直學士辭則撰此碑者  
安石子也惟據史言雋遷此官卽以病辭不拜呂惠卿勸帝  
允其請則雋實未爲此官豈撰碑時正命下之日邪  
蔣之奇澹山巖詩

此詩不見姓名而金石萃編及縣志皆屬之蔣之奇史傳言  
穎叔於神宗時由殿中侍御史貶道州監酒稅此詩蓋其時  
所題也詩中云雲牀石屏極隈隩昔有居士嘗潛蟠避秦不  
出傲聘召美名遂入賢水源攷零陵記曰周貞實零陵人居  
淡山石室秦始皇下詔徵之三徵皆不起遂化爲石宋零陵  
令王淮澹巖記略與之同周貞實作周正實避宋諱嫌名改  
也今縣志猶作正非是志載穎叔此詩脫去靈仙飛游享此

供以下四句餘亦多譌字當據石刻補正之

柳應辰浯谿題名

右柳應辰題名正書十一行不齊在石門東應辰屢過浯谿必大書深刻於石可謂好事矣此記有令家僮依舊畫鐫深之語蓋唐宋士大夫之善書者往往能手自模勒如李北海之托名黃仙鶴伏靈芝是也因而僕從觀摩亦能操刃從事則又康成之婢穎士之奴矣所謂耳濡目染其淵源授受之由蓋不獨子弟之於家學爲美談也

柳應辰浯谿詩

右柳應辰詩正書七行在心記詩右

趙揚澹山巖題名

按元豐三年趙揚尙爲轉運判官則其在官之久可約略得之題云至和乙未云云卽前題名事也

陸■等石鼓山題名

右知郡事陸■等題名正書九行字徑二寸許在西谿厓前蒲宗孟等東湖題名

攷宋史蒲宗孟傳宗孟於熙寧初爲集賢校理奉命察訪荆湖兩路奏罷辰沅役錢及湖南丁賦遠人賴之喬執中史亦有傳云王安石爲政引執中編修熙寧條例選提舉湖南常平蓋正與宗孟同時官此故有此題名王安石於熙寧二年參知政事此刻當在二年之後又彭次雲見廣西臨桂冷水巖有元豐二年和陳倩詩石刻題銜云權發遣提點刑獄公

事祕書丞當卽其人

開梅山歌出梅山歌二石刻

史傳言惇以三路兵平懿洽鼎州以蠻方據潭之梅山遂乘勢而南轉運使蔡焯言是役不可亟成神宗以爲然專委於焯安石主惇爭之不已旣而焯得蠻地安石恨焯沮惇乃薄其賞進惇修起居注則開梅山之功實蔡焯也惇旣冒其功并作此二歌以自誇小人之無忌憚也如此其地卽今安化新化二縣二歌必磨厓石刻之今不知所在

梅山頌

毛漸字正仲衢州江山人第進士知寧鄉縣熙寧經理五谿漸條利害以上察訪使者委以區畫遂建新化安化二縣漸



用是得著作佐郎知安化縣召爲司農丞提舉京西南路常  
平元祐初知高郵軍遷廣東轉運判官渠陽蠻擾邊近臣言  
漸習知蠻事徙荆湖北路轉運判官時朝廷議棄地漸曰蠻  
獯畔服不常非稍威以兵未易懷德今一犯邊卽棄地非計  
也不報渠陽旣棄蠻復大入抄略覆官軍荆土爲大擾並見  
宋史本傳漸歷官至直龍圖閣知渭州命下卒贈待制嘗爲  
江東兩浙轉運副使時患水溢乃疏開浦港悉以入海自後  
水不爲害其攝帥涇原夏人犯邊亦治兵遣將破砦漸蓋有  
才略經濟之士也劉次莊於元祐中嘗爲潭化閣帖釋文刻  
石臨江殆亦善書者據秦少游法帖通解序知其歷官至御

練潛夫層巖詩

攷輿地紀勝中興頌下引練潛夫熙寧閒作笑峴亭記當卽

此練潛夫也祁陽浯谿志但載元至元己卯王榮忠重建笑

峴亭記不知先有練記笑峴亭本熙寧閒祁陽令蔡瓊勸建

潛夫爲之記惜今已不可攷矣

米黻嶽麓寺碑陰題名

米襄陽題名三行正書左行在麓山寺碑側

陶輔等浯谿題名

右陶輔等題名正書六行左行在浯谿石壁前人未見

陳邁等澹山巖題名

陳邁題名在澹山巖署銜云朝議大夫郡守而宋史忠義傳

不載金石萃編疑其別是一人攷邁爲廣西運判乃崇寧五年見臨桂龍隱巖題名在元豐八年後二十二年

劍泉銘

張舜民字芸叟自號浮休居士邠州人中進士第爲襄樂令徽宗朝歷官至集賢殿修撰卒紹興中追贈寶文閣直學士事實詳宋史本傳傳言其元豐中朝廷討西夏陳留縣五路出兵環慶帥高遵裕辟掌機宜文字玉師無功舜民在靈武詩有白骨似沙沙似雪及官軍斫受降城柳爲薪之句坐謫監邕州鹽米倉又追赴鄜延詔獄改監郴州酒稅此劍泉銘蓋卽舜民在郴作也又神宗本紀元豐四年十月環慶營行經略使高遵裕復通遠軍癸酉復韋州十一月丁亥諸軍合

攻靈州種諤敗夏人於黑水癸卯種諤至夏州索家平兵眾  
三萬人以無食而潰丙午高遵裕以師還夏人來追遂潰則  
芸叟謫郴當在元豐四年後攷漁隱叢話載東坡云芸叟通  
練西事稍能詩從高遵裕西征回中作二絕一云靈州城下  
千株柳總被官軍斫作薪它日玉關歸去路將何攀折贈行  
人一云青銅峽裏韋州路十去從征九不回白骨似沙沙似  
雪將軍難上望鄉臺爲轉運判官李察聞奏得罪貶郴州監  
稅

窠尊銘

窠尊始於元次山作銘刻石今在道州者是任淵注山谷詩  
又云在武昌據東坡武昌西山詩序其在武昌者蓋元祐元

年鄧聖求所刻也然金石錄載有唐李氏窪尊二字范石湖石鼓山記已言之此浮休所刻銘未知以次山所作重刻抑自爲之皆不可攷矣

### 甘露堂記

今之桂陽州唐置鑄錢監於此爲桂陽監至南宋紹興三年始升爲軍元豐時尙稱桂陽監宋制諸州仍係以舊郡名故郴州亦名桂陽郡其時芸叟謫官郴州甘露堂恐在郴州桂陽郡治未必在今之桂陽州治也又攷宋史神宗本紀元豐元年七月夔州言甘露降九月河中府甘露降二年正月嶺州壽州甘露降四月六日南康軍甘露降七月瓊州甘露降十二月桂州甘露降而獨不及桂陽

天慶觀碑

攷方輿勝覽列管師復於常德府人物云自號白雲先生又  
弟師常名號二管陳公襄以公與伊川經明行修薦爲學官  
攷陳述古官神宗朝有經筵薦士章稿石刻在蘇州府學

陳龍圖緣華巖詩

宋龔明之中吳紀聞載陳龍圖使高麗云陳睦字子雍嘉祐  
六年登進士科名在第二治平中詔舉館閣才行之士子雍  
與劉李常寧李清臣輩首被選擢熙豐閒高麗屢航海修貢  
朝廷以爲恭選使往諭之初命林希子申力辭更命睦睦卽  
日就道神宗大喜語輔臣曰林希無親堅辭不行陳睦親在  
乃不憚於往因出希知池州假睦起居舍人直昭文館特賜

黃金帶命七日而行涉海踰月出入驚濤中遂抵其國使還  
乃真拜所假官職且令服所賜金帶又賜金盞於令式外以  
爲寵俄直龍圖閣知潭州卒墓在南峰山二子彥文經仲嘗  
躋法從彥武緯叔爲提舉官此九疑山題綠華巖詩者恐卽  
子雍也當是知潭州時往游而作攷東坡集有送陳睦知潭  
州詩施注謂睦字和叔神宗擢爲御史元豐元年假起居舍  
人介安燾以聘高麗除鴻臚少卿會廣州缺人以寶文閣待  
制使出守給事中韓忠彥言其偶緣汎海之勞僥倖至此不  
足以玷侍從詔從之至是以直龍圖閣守長沙與中吳紀聞  
小異東坡此詩作於元祐元年春據續通鑑長編云元豐八  
年十一月朝散大夫鴻臚少卿陳睦爲直龍圖閣知潭州蓋

命下在是年十一月至次年元祐元年春始行耳

孫欽臣浯谿題名

右孫欽臣題名正書三行左行在浯谿巖壁前人未見

陳宏浯谿題名

右陳宏題名正書二行在熙寧六年十月柳應辰題名首浯谿二字下前人未見

王定民石鼓山題名

右王定民題名正書可見者十四行後尙有五六行已磨滅僅存礪石二字可辨在西谿厓壁



古泉山館金石文編殘稿卷三

古泉山館金石文編殘稿卷三

古泉山館金石文編殘稿卷三

古泉山館金石文編殘稿卷三

古泉山館金石文編殘稿卷三

古泉山館金石文編殘稿卷三

古泉山館金石文編殘稿卷三

古泉山館金石文編殘稿卷四

宋

張綬翫巖詩刻

攷此翫字已見廣韻上聲三十八梗云天氣清明鳥猛切江蘇崑山縣地名有翫子橋元末方國珍趨翫子橋與張士誠戰卽其地今猶書此字寶慶府鄭志雜識作喬巖誤

林邵澹山巖題名

此題名後知軍州周處厚題有憲使按部過此題石之語則林邵必是官荆南提刑者而舊志未收  
柳韶等石鼓山題名

右柳韶等題名八分書十二行字徑二寸許在西谿大和題

古身山館金石之類及種名  
名下諸碑題名八卷卷十二曰字海二十三曰詩書禮記大序賦  
孫覽等朝陽巖題名

孫覽宋史有傳歷官江淮發運使進寶文閣待制由桂徙廣  
又廣西臨桂雒山有其元祐六年三月題名證以此題名自  
桂林移慶陽之語皆合

劉用之等澹山巖題名

寶興縣志無澹山巖題名

劉用之據廣西臨桂龍隱巖紹聖二年盧約題名用之署銜  
稱朝散郎經略按撫使司句當公事此題名在其前一年當  
是赴粵西任時道經零陵也

錢岳浯谿題名

右錢岳題名正書九行在小嶧臺北浯谿新志岳誤作岳唐

士衍大字

張茂先澹山巖題名

范漳父名祖禹華陽人中進士甲科從司馬溫公修通鑑在洛十五年書成溫公薦爲正字元祐初擢右正言改著作佐郎與山谷同修神宗實錄以著作郎兼侍講又召試中書舍人擢右諫議大夫遷給事中禮部侍郎入翰林爲學士其論議皆關天下大體後以紹述事興言不見聽請外以龍圖閣學士知陝州復爲言者論修實錄詆誣與山谷同貶其在講筵言簡而當東坡稱爲講官第一自元祐閒居要路與東坡志同道合力持國是東坡集中有贈答詩後沒於煙瘴年五十八東坡爲之墓志攷宋史本傳云元祐中爲翰林學士宣

仁太后崩紹述之論已興有相章惇意祖禹力言惇不可用  
言者論撫連貶武安軍節度副使韶州別駕安置永州賀州  
徙賓化而卒而東都事略則云祖禹初提舉明道宮繼責武  
安節度副使永州安置再貶韶州別駕賀州安置與本傳微  
有不同又攷哲宗本紀公與趙彥若黃庭堅同於紹聖元年  
十二月責授散官漳父永州安置至三年八月責授韶州別  
駕賀州安置又黃滄山谷年譜云紹聖三年正月范公安置  
永州任淵注山谷集云漳父紹聖二年坐史事安置永州三  
年移賀州四年移賓州元符元年九月再移化州十月病卒  
徽宗卽位有旨許歸葬較史傳所記更爲詳贍蓋漳父於二  
年春到永至三年秋始移賀此題刻於二年十月正其謫居

永州時也新安曹季明後於三年三月復有題名此稱曹守  
想其時官永州郡守耳

范正思等澹山巖題名

元氏族大全范姓下曰高平又廣韻五十五范下云姓也出  
南陽濟陽二望攷今山東省曹州府屬魏晉時置爲濟陽郡  
其鄆城縣周時又置爲高平郡則高平卽濟陽也蓋文正公  
望出濟陽故子默題名自標其望爲高平耳古人姓名上必  
標所出之郡望後代僅書其見居士著者非是

盧約等浯谿題名

盧約題名正書六行在磨厓壁間按約有紹聖元年九月澹  
山巖題名見前此蓋其自廣西罷任過浯谿時也此刻前人

未見  
蔡穀等澹山巖題名  
攷黃山谷有晚泊長沙示秦處度詩乃崇寧二年作又有題  
秦少游詩有長眠橘洲風雨寒之句任淵注處度少游之子  
少游北歸至藤州卒於江上其子處度護喪藁殯於潭  
蘇軾南嶽道士率子廉記  
東坡於元符二年自昌化移廉州又移舒州節度副使永州  
居住行至英州復朝奉郎提舉成都府玉局觀則游跡並未  
至南嶽不知何時書此記

龍興巡檢司印

大興翁比部樹培以黃小松郡丞所得古銅印拓本寄示印

方二寸許篆文四字云巡檢司印印之四側皆有正書陰款  
一側云龍興式柒年月日一側云  
一側云委差監造官樊下有押一側云巡檢司印審其文  
制似唐以後物也攷唐宋諸帝未有以龍興紀元者惟晁公  
邁歷代紀年載渝州人趙諗紹聖初元畢漸榜第二人徽宗  
崇寧二年謀叛自撰詔冊年號龍興後伏誅亦見宋史徽宗  
本紀此印恐其所鑄以給僞官者式柒年月當是貳年柒月  
之誤其模黏之劄付上三字翁釋云元帥府大團下二字翁  
釋云崖造則大團崖似是潭州地名也潭州今長沙府未知  
此印得於何地

黃庭堅澹山巖詩



山谷澹山巖詩在零陵縣南二十里大路旁巖內正書七行  
字數不齊末又有政和中僧刻石一行秦漢篆隸書二十三  
十字俱作廿卅山谷書此詩二十五作廿五從古也然詩體  
以七字爲句似當作二十爲正否則欠一字便不成句矣惜  
哉澹山世未顯任淵注山谷集本作次山次山於永州有浯  
谿及朝陽巖銘淡銘無有益是時未知名也又第二首回中  
明潔坐十客注云元次山有大回小回中詩言其水之回洑  
也此借用今審石刻實作淡山後人據任注磨改作次山形  
迹顯然又今志載此詩回中俱誤作山中石刻本作回與集  
本合然此字亦有磨改痕蓋後人轉欲據誤本改山也任注  
淡山曰零陵土人謂淡山以淡竹得名或云嘗有淡姓居之

予攷宋王淮記云昔有澹姓者家焉遂名澹巖又唐張顥記云古有老人處其下以澹氏稱因名蓋後說爲是故山谷用之淡與澹古通用字故前人記載不一此刻未有政和住持僧名智下一字上半已漫滅似高又似嵩姑缺之蓋山谷於崇寧三年題此詩至政和六年寺僧始爲之勒石也

黃庭堅浯谿題名并詩

山谷題名并詩共十一行正書在浯谿磨厓之左其後有宣和閒人題語三行似記模刻緣起也其首一行爲康熙閒祁陽令王某磨去改刻已之重修刊歲月姓名以故字蹟已失山谷眞面且題名中惜字誤從手旁此妙墨之此筆畫有譌謬萬官下一字集本作已而石刻似也又事文類聚引此句

作萬官奔竄鳥擇栖其鳥字集本作烏任淵注云鳥字或作鳥非春秋集本作春陵任淵注云春陵或作春秋非是可見當時傳本自有不同今集本乃任淵作注時更定也進士陶豫卽後刻所稱之陶介石見集中游愚谿詩序集中有云蔣彥回者亦山谷在永所交友未知卽此居士蔣大年否宣和跋所存二行上下亦多磨損不全攷澹山巖有元祐中楚入高公傑子發題名疑卽此子發秀才也讀山谷自題惜秦少游已下世不得此妙墨劉崖石之語知當時此詩未及刻石而墨蹟藏於子發秀才家至宣和時乃勒石耳子上一字當是庚庚子乃宣和二年在崇寧三年後十六年少游卒於建中靖國元年乃崇寧三年之前四年也武虛谷謂偶強作數

語集本少偶字今石刻偶下並無強字誤也

黃庭堅書蒙泉二大字

石門縣方頂山有蒙泉二字正書大徑一尺五寸許其右有小正書申陵黃魯直書六字陽文凸起

鄒浩等活谿題名

鄒浩題名正書六行在活谿厓上攷史傳謂浩爲右正言章惇爲相每觸惇忌因詆其狂妄削官羈管新州徽宗立召還復官屢遷至兵吏二部侍郎以寶文閣待制知江寧徙杭越州蔡京用事又疏害之再責衡州別駕尋竄昭州五年始歸其責衡州別駕及竄昭州傳皆不詳其歲月而本紀云崇寧二年正月浩與任伯雨陳瓘龔夬同竄嶺南合紀傳觀之二

年以後五年以前浩當在昭州不應至此題名宋史恐有舛  
譌後讀高斯得恥堂存稿跋甘泉銘亦以此爲疑而云四年  
九月移漢陽軍豈九月乃正月之誤邪又讀胡仔漁隱叢話  
引復齋漫錄云鄒志全元符間貶新州徽宗卽位以爲中書  
舍人未幾謫零陵別駕龍水安置未幾徙昭則又以衡州別  
駕爲零陵別駕與正史不合並志之以俟知者浩字志完漁  
隱叢話作志全蓋避欽宗嫌名也浯谿新志伯新誤作伯許  
崇寧誤作熙寧成權逸道人文照伯新義明並見前山谷題

記

高衛浯谿題名

右高衛題名正書四行在鄒浩題名後前人未見

錢蘇浯谿題名

錢蘇字岳父吳越王後以孝義知名居杭州錢唐門外九里松之閒建傑閣藏書甚富東坡榜之曰錢氏書藏仕至直祕閣知荆南府其兄穆文有寄仲弟岳父詩曰東方千騎擁朱輪衣錦歸逢故國春莫向西湖戀風月鵠原知有望歸人見武林紀事此題名恐卽岳父官荆南時游題也

李朝林祿洞題名

己巳嘉平於役沅州至麻陽縣西五里游林祿洞土名蝦蟆洞洞內如屋高丈許左壁有題名七行係宋大觀閒縣尉李某所題正書字徑寸許因作詩紀之麻陽古牂柯朗江清且泚唐時置錦州辰砂實產此山連九疊青谿洞列宛委傳聞

有兩珠民居若塵市

兩珠洞在縣西北二十里

髣髴避秦人來住桃源裏

別有林祿洞官村上五里穹然石室清金庭差可擬土人呼

蝦蟆其形頗相似似望齊天

山高祇如培塿爾遐哉大觀閒

仙尉系李耳良秋偕老僧游此題緣起壁餘蒼蘚字石沒蠟

屐齒我來霜雪天摩挲生仰止千載想李君瀟灑定雅士不

受抱關束秉燭良有以堪歎今之人營營不知已長年困簿

書肉食眞可鄙

蓋士

浯谿題名

右蓋士題名正書五行在小嶧臺北浯谿新志亭誤平蓋

誤張經誤過戴誤趙廿誤二十

李伯魚浯谿題名

右李伯魚題名正書七行在小嶧臺北浯谿新志缺首四字

北歸攜家誤作攜家北歸庚寅誤作庚辰

劉德甫浯谿題名

右劉德甫題名正書五行在磨厓壁閒前人未見

移建皇帝本命殿碑

廣西臨桂屏風山有大觀四年侯彭老程公巖記爲趙旻書

自號梵山人當卽撰此碑者旻時通判潭州而長沙府志

未載

諫議大夫龔夬墓石

龔夬見元祐黨籍碑又宋史傳云徽宗立召拜殿中侍御史

抗疏論章惇蔡卞之惡又論蔡京治文及甫獄於是三人皆



去又上疏乞正元祐后位號及元符后不當並立書報聞已而元祐后冊再廢言者論夫首尾建言詔削籍編管房州繼徙象又徙化徒步適貶所持扇乞錢以自給逢赦令得歸政和元年卒紹興元年贈直龍圖閣六年再贈右諫議大夫則夫並未卒於嶺外何以有子等迎柩歸葬之事又傳首言夫進士第三簽書河陽判官從曾布於瀛後云弟大壯少有重名清介自立從兄官河陽曾布欲見之不可得乃往謁夫邀之出從容竟日題詩壁閒有得見兩翼之語夫爲御史大壯勸使早去夫以爲畏友不幸早卒則夫有弟而無兄又名大壯而非名明且早卒並未有官奉議言事之文更非俱以直言貶死明統志之言多不可信縣志云趙汝讜提舉表其墓

攷汝讜宋史有傳傳言登嘉定元年進士第爲大社令遷將  
作監簿大理司農丞與史彌遠不合請外改湖南提舉常平  
易江西等提點刑獄徙湖南旣至表直臣龔夬墓則汝讜表  
墓乃後徙湖南提刑時事而非先官提舉時事也縣志亦誤  
程皞等麓山寺碑陰題名

右程皞等題名正書七行左行在李北海碑陰第三截右  
吳少逸浯谿題名

右吳少逸題名正書四行左行在磨厓壁閒前人未見

黃仲堪浯谿題名

黃仲堪題名正書九行在浯谿磨厓下攷仲堪山谷弟也見  
山谷題跋禮思大禪師題名雙井乃山谷所居鄉名在洪州

分寧縣其地產茶山谷題跋石門寺與韓城元聿同游題名  
自稱雙井黃某石門乃寺名宋溶浯谿新志采作浯谿厓旁  
之石門題名誤矣又廿九日作二十九日黃作王民作氏皆  
非

岳飛大營寺題刻

祁陽縣北五十里有大營寺卽古大營驛爲宋岳鄂王駐軍  
題壁處時吾鄉明唐荆川先生之父守永州日曾以王所題  
記及廣德金沙寺詩共勒一碑後荆川先生爲之記歲久文  
字殘缺近人重刻一碑於左今兩碑並存寺中按其文題建  
炎二年七月建炎縣志誤作紹興

賈時舉等浯谿題名

石題名正書五行在磨厓壁閒前人未見

尙用之澹山巖詩

澹山巖有尙用之和山谷韻詩按用之字仲明曾官廣西提  
點刑獄臨桂諸巖有其宣和閒與張洵同游題名洵字仁仲  
浚儀人時官廣西廉訪使者蒙亭倡和詩共五人首爲浚儀  
張洵次卽用之次爲晉江呂源次爲三異李昇之次爲邵武  
葉宗諤也用之稱江都尙用之與此題名正合紀年爲靖康  
改元丙午季夏乃在此前四年事石刻見存廣西臨桂縣伏  
波巖其爲一人無疑詩序嘉祐紹聖云云乃溯其從前蒙亭  
始事宋詩紀事從粵西詩載傳錄不全遺其倡和年月故  
金石萃編疑之今爲補正冷齋夜話載陳瑩中北歸過南昌

言鄒志完北還至永州澹山巖有馴狐凡貴客至則鳴志完  
將至而狐輒鳴寺僧出迎志完怪之僧以狐鳴爲言志完作  
詩曰我入幽巖亦偶然初無消息與人傳馴狐戲學仙伽客  
一夜飛鳴報老禪此尙用之謂長老琦公有訓狐不相報否  
語及我來訓狐無所聞之句蓋正用鄒道鄉澹巖故事也訓  
與馴古通用字零陵縣宗志載此刻末有仲春望日住巖賜

紫善琦跋

潘正夫浯谿題名

吳國長公主題名七行正書在浯谿石門之後浯臺西石上  
吳國長公主乃宋哲宗第三女也攷宋史本傳始封康懿公  
主進嘉國慶國政和二年改韓國出降潘正夫改淑慎帝姬

靖康末以先朝女留於汴建炎初復公主號改封吳國避地至婺州紹興四年入是真子堯卿等五人各進官一等主奏言祖宗以來駙馬都尉石保吉等皆除使相今正夫歷事四朝在京曾建議迎陛下至杭州又言禁衛未集豫宜防變乞除開府上不許八年再入又爲正夫求恩數上曰官爵豈可私與人況今日多事未暇及此時趙鼎當國方論羣臣紹述之姦頗抑正夫鼎去位正夫始得開府之命給事中劉一止言其非體恐援例者多乃詔哲宗惟正夫爲近親餘人無得援例顯仁太后歸主同秦魯國大長公主迎於道十九年又入朝子長卿粹卿端卿皆自團練使升觀察使從所請也孝宗卽位進封秦國大長公主隆興二年薨諡康懿主在日正

夫官至少傅封和國公溫卿寧國軍承宣使長卿寧江軍承  
宣使端卿昭信軍承宣使清卿容州觀察使墨卿才卿並帶  
團練使其威如此正夫薨於紹興二十二年贈太傅此題名  
不書年月而稱吳國長公主則在建炎改封之後矣據前錢  
遜叔題澹山巖詩爲建炎四年仲冬其與正夫唱和又在春  
則正夫至永乃紹興初年事傳言紹興四年入是真子真卿  
等五人各進官一等此題名有弟堯夫而子無堯卿名又止  
四人與傳不合攷史於傳後歷敘正夫子之官階亦不及堯  
卿豈正夫長子先正夫而沒者歟此題名已無堯卿則又在  
紹興四年之後恐史文有錯誤也傳又云十九年子長卿粹  
卿端卿皆自團練使升觀察使而不及溫卿蓋溫卿其時猶

年少也傳又有清卿墨卿才卿三人此題名所無蓋此三人皆正夫幼子或其時尚未生耳又攷朝野雜記所載與史傳略同惟署正夫官爲少保昭化軍節度使和國公秦國康懿大長公主亦云哲宗第三女而石刻鋪敘云絳帖前後各十卷相傳駙馬潘正夫以閣帖增損翻刻潘尙哲宗第四女秦國公主云云似誤也又按史宗室世系表子珊官武翼郎子佩官武節郎皆奉化郡公令緝之子太祖次子燕王德昭之五世孫也與吳國長公主爲昆弟行故稱舅也

嶽廟祭告文

向子諲字伯恭臨江人建炎中知潭州金人移兵湖南率軍民以死守紹興元年移鄂州主管荆湖東路安撫使詳宋史



本傳傳又言子謹以徽猷閣直學士知平江府金使議和忤  
秦檜意致仕退閒十五年號所居曰薌林卒年六十八攷樓  
大防薌林居士文集敘云公卜居臨江多植巖桂又素慕香  
山自號曰薌林有船曰泛宅高宗親書大字及企疏堂以寵  
其歸

無相庵三篆字

右刻在磨厓右無相庵三大字篆書河東云云一行題於右  
無相大士云云一行題於左正書隸字隸變作無庵乃盦之  
俗字此宋人之明於六書者可貴也浯谿新志脫于字以奉  
作供奉誤

蔡說浯谿詩

右詩正書十二行左行在磨崖左浯谿新志見磨崖碑之見  
作讀下文■見於是時改作千載如見又五十六字作五言  
六韻末無題字皆誤

太宗戒石銘

右宋太宗戒石銘黃山谷書紹興二年七月勒石篆額三行  
六字碑分三截上爲山谷正書戒石銘六行行四字次爲高  
宗御書跋語及押十三行行九字行書下爲權邦彥等記及  
銜名廿七行行十五字正書前人未著錄余於己巳夏四月  
於役道州於州治堂側羈候所壁閒訪得之亟命工拓其文  
致洪容齋續筆據野人閒話謂蜀王孟昶爲令箴頌諸邑共  
二十四句宋太宗摘其中爾俸爾祿民膏民脂下民易虐上

天難欺四句書賜郡國謂之戒石銘亦見孫奕示兒編又元  
吳郡徐元瑞史學指南中亦載此戒石銘十六字云漢唐以  
來未嘗有之五代時蜀主孟昶始頒令箴於諸邑其文云云  
凡二十四句宋朝太宗刪繁取簡摘其二聯一十六字頒行  
天下至高宗紹興閒復以黃庭堅所書命州縣長吏刻石座  
右至今官府存焉至元癸巳浙西廉司移治錢塘司官大使  
容齋徐參政改書其銘曰天有昭鑒國有明法爾畏爾謹以  
中刑罰以兩書證之正與此刻合惟山谷書既稱御製高宗  
跋亦稱御製絕不言四語之所本蓋不欲取法於蜀景故諱  
言之耳竊歎此銘宋太宗既徧令郡國立石高宗又以山谷  
書頒降天下刻石訖今於道州之外僅於粵西梧州潯寧尚

存此刻可見金石留傳之難今世州縣堂前牌坊上往往書此十六字罕有知其出處者矣碑之下載有紹興二年七月權邦彥等記中云皇帝撥亂愛民規撫祖宗乃六月癸巳詔以黃庭堅所書刻之石云云蓋紹興元年六月下詔至二年七月始勒石然宋史本紀皆失載此事以紀傳宰輔表攷之秦檜於紹興元年八月自參知政事授通奉大夫守右僕射同中書門下平章事兼知樞密院事與秦檜同秉政檜謀奪其柄建言二相宜分治內外乃於二年四月除頤浩都督江淮荆浙諸軍事開府鎮江與石刻題銜正合惟表及頤浩傳稱少保而此云特進自當以碑爲正孟庾以紹興元年十月除參知政事十一月爲福建江西荆湖宣撫司權邦彥以紹

興二年五月自左朝議大夫兵部尙書遷端明殿學士除簽書樞密院事六月兼權參知政事史言兼權碑但稱權亦當以碑爲正又攷建炎四年合江東西爲江南路紹興初復分東西碑所云江南西路者乃江洪筠袁虔吉州興國南康南安軍也又紹興元年正月荆湖分東西二路東路於鄂州置安撫使西路於鼎州置安撫使二年二月復荆湖東西路爲荆湖南北路安撫使於南路治潭州北路治鄂州至宣撫使一官不常置以二府大臣充故孟庾以參知政事出爲此官是時建安范汝爲反又賊曹成劉忠等作亂荆湖閒朝廷以韓世忠副孟庾於潭州皆降斬之湖南乃平正此立碑時也其題銜朝議通議通奉上皆有左字者攷紹興元年十二月

詔舉行元祐之法官階繫銜復分左右至淳熙始去之碑刻正在下詔之後故皆加左字文中貞觀作正觀避仁宗諱也德山張提刑詩碑

家吾山廣文拓贈武陵德山紹興壬子詩碑額題提刑判院張公德山留題篆書五行下刻詩正書十行行十三字末書紹興壬子重陽日壬子乃紹興二年張公名碑不書攷元祐中有張綬提點荆湖南路刑獄見武岡州之翕巖詩豈此題紹興壬子爲立碑之歲月歟常德府應志誤以此詩爲周必大作按益公通判鼎州在孝宗朝時代亦不合與題題天

董弇澹山巖題名

董令升題名有云千文真跡余家所藏嘗刻石鄉里攷胡仔

漁隱叢話云藏真千字文真跡舊蓄於江南李氏紙尾有後  
主錯金書題云懷素僧草聖戴叔倫詩云詭形怪狀飜合宜  
誠哉是言其後此真跡又轉蓄於董令升家紹興閒歸天上  
矣

李若虛浯谿詩

右李若虛詩正書十三行在磨厓石壁書法頗佳乃學山谷  
者

襄陽曾思等嶽麓寺碑側題名

右曾思等題名八分書五行在麓山寺碑側米襄陽題名下  
江藻書華嚴巖三篆字

浮谿集柳先生祠堂記云紹興十四年余來零陵則浮谿翁

於甲子年到永又據明胡堯臣浮谿祠記文謂奪職居永州積十有二年更四赦不復用先生泰然處之愠不見色

游何浯谿題名

宋游何題名八分書七行在磨厓壁閒濳州當是淄州此因隸變字形相似而譌按太宗六世孫皆以不字排行為名此不蹟名不見於宋史宗室世系表必有脫誤

太學上舍題名碑

浮谿翁題銜稱提舉江州太平興國宮者宋時謂之宮觀使也宮觀使置自眞宗祥符申在京以前宰相見任史相領之在外則少保已上始得使名使相已下提舉宮觀而已見李心傳朝野雜記提舉宮觀眞宗時以兩省兩制丞郎官爲之



天聖七年以後學士待制知制誥皆得爲提舉初設祠祿之官原以佚老優賢員數絕少王安石相欲以處異已者遂詔無限員又在外宮觀嶽祠初須力請而後授若因責降改作管句差焉亦安石相後異已者方直除大抵非自陳而朝廷特差者如降黜之例又熙寧二年詔宮觀五嶽廟並置管句提舉提點官四年詔各留一官餘聽如分司致仕例從便居住其時宮觀止十餘江州太平興國宮其一也並見文獻通攷時浮谿以顯謨閣學士出知徽州徙宣州爲言者所論奪職居永所謂學士得爲提舉也太平興國宮在江州不赴江州而永州居住者所謂黜降及聽如分司致仕例從便居住是也今縣志谿志載其文不明宋制改舉爲學宮爲公繆甚

故爲正之

劉蕘浯谿題名

右劉蕘題名八分書五行在東厓石上

李元老浯谿題名

右李元老題名正書六行在磨厓石壁浯谿新志耆明耆厚  
耆勳六字誤作耆厚勳三字又壻鄭种脫壻字种誤重

亦樂堂銘

朱子大全集有與方耕道書三通想卽其人也今據石刻則  
其名疇大全集題下注耒字恐後人所注誤也武岡州志謂  
方疇紹興元年上書論時政出判武岡二十四年謫雷州今  
據胡邦衡此文云紹興戊午同朝是年冬銓被譴耕道旋亦

去國十有四年而通守武岡乙亥謫零陵是耕道於紹興二十  
十一二年至武岡二十五年乙亥謫零陵並非謫雷州也攷  
宋史高宗本紀紹興二十四年十一月以通判武岡軍方疇  
通書胡銓及他罪除名永州編管蓋命下在二十四年冬而  
次年始到永耳

李逸 浯谿題名

李逸題名正書七行在磨厓石壁自稱盤谷李逸必是唐李  
愿後裔其云貳郡鴈峰者蓋逸時通判衡州也清湘縣在今  
廣西之全州係馬氏置爲全州治明洪武中始省入全州宋  
時全州曾屬荆湖南路故李逸有被檄如清湘事浯谿新志  
脫如清湘事竟五字哉誤作跡

劉芮浯谿題名

劉芮等題名八分書六行左行在嵒臺西攷宋史宗室世系表魏王廷美之六世孫皆以公字排行表列以公衡名者四人一爲秉義郎公衡承議綽之之子一爲從事郎公衡左中奉大夫縱之之子皆潁川郡王德彝之後一爲承節郎公衡忠翊郎緒之之子乃廣陵郡王德雍之後一爲忠訓郎公衡忠翊郎廩之之子乃申王德元之後宋制選人許乞嶽廟故朱文公嘗以左迪功郎監南嶽廟選人者進士也進士選官例得防團推官監判官元豐改官制以階易官崇寧後選階換從事郎其秉義承節忠訓等郎皆武階此公衡以選人監南嶽廟階應從事郎則必德彝之後縱之之子矣

困齋銘

右困齋銘在零陵縣張欽夫卽南軒南宋後避異祖諱敬字

改也

修康濟廟路記碑

右修康濟廟路記陳阜撰八分書十八行行廿三字篆額六

字在寶慶府城外雙清亭下

乾道戊子石鼓山殘題名

右乾道戊子殘題名正書四行行五字字徑二寸許在石鼓

山西谿首有殘缺文多漫漶不可辨江恂清泉縣志未載戊

子乃乾道四年也

劉董等澹山巖題名

澹山巖乾道戊子劉董等題名有淮陽王光祖仲顯按石鼓  
山題名光祖時官衡陽令外舅錢少詹跋慈恩塔王評題名  
八月上澣云按漢制公卿以下皆五日一休沐唐會要永徽  
三年上以天下無虞百司務簡每至旬假許不視事以便百  
僚休沐則唐時十日一休沐矣休沐亦謂之休澣唐書劉晏  
傳質明視事至夜分止雖休澣不廢也宋時百官旬假循唐  
故事故有上澣中澣下澣周益公撰光堯丁亥本命道場滿  
散朱表有日踰中澣之句攷其日乃十月二十一日又撰四  
月十八日丁亥本命道場朱表亦云日近中休然則每月之  
二十日爲中澣日上澣必月之十日矣一旬之中止一澣日  
今人以上澣中澣下澣當上旬中旬下旬旣失其旨又休沐

惟有官人乃可用之不當通之士庶也今據此澹山劉董題  
名曰上休日及後趙仲義題名曰上澣日李震等題名曰中  
澣日諸刻證之少詹之言益見精確口後中澣原題曰  
李處端浯谿題名

右李處端題名在磨厓壁間後半剝蝕并爲後人磨去改題  
僅存此二行十字矣正書

范成大浯谿詩

范成大字致能吳郡人紹興二年四年進士第授戶曹監和  
劑局遷正字累遷著作佐郎除吏部郎官罷奉祠起知處州  
遷起居郎假資政殿大學士充金國使全節而歸除中書舍  
人知靜江府除敷文閣待制四川制置使除權吏部尚書拜

參知政事兩月奉祠起知明州除端明殿學士尋帥金陵以病請閑進資政殿學士再領洞霄宮紹熙二年加大學士四年卒見宋史本傳傳言成大素有文名尤工於詩上嘗命陳俊卿擇文士掌內制俊卿以成大及張震對自號石湖據傳敘成大知靜江府於張說除簽書樞密院事後攷宰輔表張說除簽書樞密院事乃乾道七年辛卯此刻序云乾道癸巳在後二年正與史合靜江府卽桂林也

陳從古浯谿詩

右陳從古詩正書九行在嶠臺西北石壁筆法甚佳

朱文公題周濂谿像贊

道州周元公祠有濂谿先生像碑像高三尺餘上題朱文公



像贊正書六行碑無刊刻姓名年月文公書字亦非眞面攷  
大全集愛蓮說記朱子於濠熙己亥守南康郡立濂谿祠於  
學刻濂谿像於石零陵縣志謂方疇於九江得之先生諸孫  
郡守魏紹芳重刻歷六百年云云今審此刻並無年月姓名  
可攷不似舊刻必是近代人重摹者

朱文公書太極圖說

道州有太極圖碑上爲四圖下刻朱文公太極圖說無年月  
攷大全集愛蓮說記此圖亦文公刻於南康者道州本蓋近  
人以南康本翻刻也

沈時等麓山寺碑陰題名

右沈時等題名八分書四行在李北海碑陰第四截下保慶

卽寶慶攷漢石經春秋左氏傳盜竊寶玉大弓之寶作保乃  
古文也

劉學雅浯谿題名

劉學雅題名正書四行左行在余靖題名末行下空處其第  
三行堂除下爲後人磨去改刻缺數字矣攷學雅係從事郎  
監潭州南嶽廟劉坪兄子樞密琪之長子琪坪二墓志俱朱  
子撰見大全集琪卒於淳熙五年時學雅官承務郎此云以  
廣西帥按劾特降一官停轉運司主管文事見任永不與堂  
除者宋制轉運司屬官有主管文字一員蓋學雅時爲廣西  
轉運屬官被劾削去不準復除他官也所謂堂除者猶今之  
吏部挑選耳題名末云經浯谿再題則必先已有題刻矣今

未見此刻前人未著錄余搜剔得之

桃源洞詩碑

按宋史本傳王梅谿並未至此不知何以有桃源洞題詠梅谿當卒於紹熙三年今宋史作紹興三年字誤

雷澤蒙巖題名

題名在宜章縣蒙巖口攷姑蘇志守令表雷澤以朝散大夫直煥章閣紹熙四年七月知蘇州五年九月主管建寧武夷冲佑觀卽題名所云出守吳門來冬奉祠歸長沙事也

王容等嶽麓寺碑側題名

右王容等題名正書二行在嶽麓寺碑側

澹山巖澹岩二字

澹山巖洞門外上鐫篆書澹岩二大字長丈許旁題慶元己未重陽日通判永州徐大節書邑令王淮刊

趙彥櫛浯谿題名

趙彥櫛題名正書七行在浯谿磨厓碑右書法頗有晉人風骨攷宋史宗室傳彥櫛字文長悼王七世孫登乾道二年進士第尉樂清又官福建路運幹慶元初知晉陵縣多善政擢登聞檢院時韓侂胄當國朝士悉趨其門彥櫛切歎惋出知汀州遷廣西提刑侂胄死詔戶部侍郎兼樞密院檢詳遷湖廣總領又知平江府昆山縣並奏分置嘉定縣轉寶謨閣待制卒於官年七十一此正彥櫛由汀州遷廣西提刑時道經浯谿所題朱子大全集有與趙子欽彥櫛書子欽蓋其號也

浯谿新志繡誤作繡脫頌字客字退誤作返焯誤作焯

牟希元浯谿詩

右牟希元詩約有十三行行十七字前詩漫漶已甚不能審

讀止存末二行可辨正書左行前人未見

趙崇憲等浯谿題名

浯谿有趙崇憲崇尹崇模崇寬四題名皆在磨厓之左厓凹間以次續題自南而西北第一趙崇憲四行次崇尹四行次崇模五行次崇寬五行皆正書字大小不齊攷宋史宗室世系表崇憲崇尹俱漢王元佐之後贈太師申國公不求之曾孫善應之孫必益乃崇憲之子必柄必爽皆崇尹弟崇夏之子必樞乃崇尹同八世祖崇瀚之子也崇瀚兄崇濬之子有

必槩卽必矩也崇模不見於表而以必珂係於崇憲弟崇夏之兄崇樸下非崇樸乃崇模之誤卽必珂上脫去崇模二字崇寬名亦不見於表恐皆表之脫誤也據此可以正之表有兩崇憲皆係漢王之後以前後四題名證之此崇憲當是汝愚之子崇尹乃汝愚弟汝拙長子也浯谿又有趙必愿題名必愿亦汝愚之孫崇憲之長子也史有傳崇憲史附其父汝愚傳字履常淳熙八年對策第一越三年復以進士對策擢甲科初仕爲保義郎監饒州贍軍酒庫換從事郎撫州軍事推官汝愚帥蜀辟書寫機宜文字改江西轉運司幹辦公事監西京中岳廟汝愚旣貶死海內憤鬱崇憲闔門自處居數年復汝愚故官職多勸以仕改奉議郎知南昌縣事荒政所

活甚多升籍田令以父冤未白上疏力辭俄改監行在都進  
奏院復引陳瓘論司馬光呂公著復官事申言之乞以所陳  
下三省集議辨其父之讒謗顯其父之功德乞下史官改正  
誣史又請正趙師召妄貢封章之罪究蔡璉與大臣爲仇之  
姦毀龔頤正續稽古錄之妄詔兩省史官攷訂以聞復以誣  
史未正進言復玉牒所卒重修龍飛事實未幾贈汝愚太師  
封沂國公擢崇憲軍器監丞改太府監丞遷祕書郎尋爲著  
作佐郎兼權考功郎又因閔雨求言上封事請外知江州疏  
蠲江州民和糴又以瑞昌民負茶引錢請以新券一償舊券  
以紓民困受賜者千餘家刻石以紀其事修陂塘以廣溉灌  
數千所提舉江西常平兼權興府及帥漕司事遷轉運判

官仍兼帥事修復汝愚捐剏養濟院更復社倉以兵部郎中  
召尋改司封皆固辭遂直祕閣知靜江府廣西經略安撫靜  
江屬邑之賦再加蠲減縣民立祠刻石劾瓊守激黎峒之變  
民何響父子導峒蠻爲寇繫置之法嚴民夷交通之禁又條  
上復扞防谿峒之議朝廷頗采用之天性篤孝居父喪月餘  
始食小祥始茹果實終喪不飲酒食肉比御猶弗入者久之  
此題名蓋崇憲知靜江府經略廣西時道經浯谿所題也又  
廣西臨桂有新潭州善化縣主簿張茂良廣西經略顯謨趙  
公德政頌碑云紹定四年秋有詔帥廣西趙公進直顯謨閣  
易鎮寶婺桂人德公之久結戀不釋又云公丞相忠定之三  
子名崇模模字履規粵西文載謂崇憲弟崇模亦知靜江有



美聲蓋後崇憲二十六年今據題名則崇模知靜江府乃寶慶二年在崇憲十二年之後又五年而易鎮婺州去任也文載作二十六年誤此四刻前人皆未見粵西金石略載有嘉定丙子曾全洪友成趙必益必矩等題名以此刻證之曾全恐是曹全之謠

劉用行浯谿詩

右劉用行詩正書七行在磨厓左厓上趙崇憲題名後深沒土中發掘洗拓僅得上截此刻前人未見按劉用行撰有紹定五年茶陵築城記中云余以屬郡丞詣潭白事則用行恐官永州丞者

林伯成浯谿詩

右林伯成詩正書十二行在磨厓石壁前人未見朝野雜記載丙寅淮漢蜀口用兵事目中有盱眙守臣施宿正旦副使林伯成皆言北方事云云乃在開禧四年正月後疑卽此題詩之林伯成也

方信孺浯谿題名

右方信孺題名七行每行一二三字不等正書大徑六寸許臥刻於浯谿石門右北小石上面向上半沒土中余發土搜剔出之三上一字石已損缺攷宋史傳云方信孺字孚若興化軍人少有雋才爲周必大楊萬里所賞以父蔭補番禺縣尉後爲朝臣所薦假朝奉郎樞密院檢詳文字充樞密院參謀官持督師書通使於金往返三次俱以正辭折敵還朝以

金人欲得太師頭語櫻韓侂胄怒奪三秩臨江軍居住後王  
相使金和議成歸奏言皆信孺備嘗險阻再三將命之功金  
人見相必問信孺安在乃詔信孺自便尋知韶州累遷淮東  
轉運判官兼提刑知真州山東初內附信孺言宜選威望重  
臣將精兵數萬開幕山東以主制客坐責降三秩再奉祠稍  
復官信孺性豪邁輕財好客使金時年甫三十其尉番禺有  
捕海盜功知真州卽山築隄後金人至決水退敵城乃獲全  
旣去官歸營巖室放於詩酒而沒按今廣西臨桂巖洞多信  
孺題刻乃自嘉定六年三月訖八年八月官廣西提點刑獄  
兼轉運判官時也據吳獵撰信孺父故廣西轉運判官方崧  
卿祠堂記崧卿於紹熙壬子四月至桂林此題名云紹熙癸

丑者蓋信孺於壬子次年赴父任時經浯谿也攷寧宗戊辰年改元嘉定終於十七年甲申其十年當爲丁丑粵西金石略謂信孺嘉定九年十二月尙爲本路運判則此丁下所缺一字必是丑字蓋信孺於十年去廣西任復經浯谿而又兩游其地故云三訪耳此刻前人未著錄

留筠浯谿詩

右留筠詩行書七行在磨厓左厓上前人未見攷留筠係孝宗朝參政留忠宣正之次子也廣東南海蘇文忠浴日亭詩乃其所刻跋云嘉定辛巳則在此刻後四年矣後澹山巖詩自署其字曰端父與浴日亭詩跋同此與澹山巖二刻俱云行部來游則筠必持節官荆南者而舊志俱無其名修志不

搜金石知缺漏者多矣浴日亭詩跋中云筠舊得此真蹟於  
湘中蓋正指此題名時言之彼此可以互證筠書法端秀似  
學顏清臣者

留筠再題浯谿詩

右留筠再題浯谿詩草書七行卽在前題之後北面前人亦  
未見

徐自明浯谿詩

右徐自明詩正書十三行在磨厓石壁首行已爲後人題刻  
磨去前人去見攷自明字誠甫撰有宰輔編年錄

宋曾煥浯溪詩

曾煥題名行書七行在磨厓石壁案廣西臨桂嘉定丁丑題

名煥字少卿乃在此前三年此云將漕廣西召還則此次似  
未經到粵西矣丁丑題名時未知煥爲粵西何官此刻前人  
未見

張潞浯谿詩

右張潞詩行書十三行在磨厓壁上前人未見

趙必愿浯谿題名

攷崇憲題名見前乃嘉定乙亥四月故云整整一紀洪下缺  
一字據前嘉定題名當是友成

黔陽縣重修縣治記

右黔陽縣重修縣治記碑翁永年撰單銓書正書廿二行行  
三十九字篆額五行行二字在沅州府學明倫堂庭東壁間

無上宮主訪蔣暉詩

無上宮主訪蔣暉詩并記作兩截上刻詩草書四行下刻記  
正書廿四行在祁陽縣北六十里官道之左乃紹聖中蔣暉  
記遇呂仙贈詩事暉記云稱宮先生又曰呂公自言回先生  
亦云無心昌老昌字無其心卽呂字今謂無上宮主宮字無  
其上亦呂字也攷宋人東軒筆錄載滕宗諒守巴陵有華州  
回道士上謁風骨聳秀滕知其異入口占以贈之曰華州回  
道士來到岳陽城別我游何處秋空一劍橫回聞之憮然大  
笑而別則華州回道士云云一詩乃宗諒賦贈呂仙者今全  
唐詩采入呂詩中反其題曰贈滕宗諒誤矣此訪蔣暉詩全  
唐詩題作題全州道士蔣暉壁譙罷作醉舞月瓢作天瓢浴

誤作結雲誤作空皆當以碑爲正

吳千能澹山巖祠

高斯得恥堂存稿永州續惠倉記云千能新鄭人

褚公祠堂記

魏鶴山褚公祠堂記在湘鄉縣東門外褚公祠文十三行行五十字末題紹定三年庚寅三月辛丑臨邛魏了翁記并書篆至治元年辛酉九月甲戌錄之鑿於新祠蓋元人重刻也攷宋史魏鶴山本傳理宗卽位遷起居郎俄權尙書工部侍郎以疾辭乃以集英殿修撰知常德府越二日爲朱端常所劾詔降三官靖州居住紹定四年復職主管建寧府武夷山冲佑觀則作此記時正謫居靖州日也文中云斷碑所勒有



遠山峭崿翠凝煙之詩卽天下金石志所載洗筆池斷乃褚公湘潭偶題詩宋淳熙中邑宰趙必槐得之池中者也長沙府志載此文縣治之北脫之字而潛治焉焉作之又脫斷碑所勒一句漣水衡陳之衡作橫感於所不係止於所不見三句於下俱有其字轍跡所繇之繇作由豪端所沾之沾誤治升者之升作合朝茵之茵誤茵前拜之前誤翦而社祠之脫之字亦自邇其躬耳矣無矣字詩書誤作詩禮庚寅土多歲字皆當以碑爲正惟劉泊之泊據唐書當作泊蓋翻刻之誤也戊辰夏五余游此祠親至碑下碑四方其一面刻此記其三面則刻元至治初元九月張圖南重修褚公祠記讀其文知祠與碑俱毀壞判官彭致堯復興修之圖南爲之記并重

刻此文於前也

李伯堅浯谿題名

右李伯堅題名正書八行在磨厓壁間前人未見攷宋史宗室世系表趙師榘係趙伯暹子趙孟湜係趙與偕子皆燕王德助之後

衛樵浯谿詩

右衛樵詩正書十一行後二行微小在磨厓碑左厓下前人未見衛樵乃我吳崑山衛太師文節公名涇之子宋凌萬頃玉峰志元東谿老人楊諱崑山志但言其魁銓闈又魁鎖廳終知信州而不及守永州事又零陵志載其題澹巖詩自署中吳衛樵山甫山甫蓋其字也皆可據以補之文節亦於嘉

定中知潭州攷姑蘇志傳略云字精叔漳熙十一年進士第一授承事郎添差鎮東軍簽判歷官至資政殿學士金紫光祿大夫致仕進封吳郡開國公寶慶三年卒理宗輟視朝一月特贈太師進封秦國公賜諡文節開禧三年自吏部尚書拜御史中丞時請誅韓侂胄論罷陳自强拜參知政事嘉定初兼太子賓客又患史彌遠有專恣之漸因欲去之彌遠知溼謀諷御史劾罷之五年出知潭州八年改知隆興府先居里中闢西園取范文正公之言名其堂曰後樂後寧宗以其三世同居有堂曰友順御書二大字太子亦爲書後樂堂榜賜之文節歷仕三朝出入內外四十餘年憂國忘家始終一節謀深慮遠不邀近功嘗語人曰官職自有定分名義千古

不磨故其在朝孤立自守不畏強禦薦進賢才汲汲如不及  
若李燔輔廣倪思陳韓皆其人也守潭時與朱文公有交誼  
之情侂胄斥文公及侂胄死奏召還朝而文公已卒復移文  
新安取諸經四書傳注刊刻以傳又請爲張南軒賜諡其表  
章正學之功如此自號後樂居士所著文章五十卷曰後樂  
集廖道南楚紀雖載文節知潭州事而云齊人謬矣故今爲  
表而正之

婁續祖悟谿詩

右婁續祖詩正書八行文多漫漶在唐亭厓下前人未見

墨池亭碑

攷按方輿勝覽張顛墨池在龍陽淨照寺有小池張旭學書

於此又宋史有劉清之傳云字子澄曾知衡州然傳言光宗  
卽位起知袁州而疾作遂卒則不應於理宗紹定間尙有持  
檄過龍陽之事且後又有游層巖詩在淳祐丙午則此劉子  
澄恐另是一人而其名爲子澄者

趙楷語谿詩

右趙楷詩正書八行在葦蘿題名後前人未見  
李日新語谿題名自提詩樂舞士祠舊文意正十分內  
右李日新正書五行在磨厓壁間前人未見

王淦澹山巖題名

按王淦字淵道臨海人秦國公之望孫也紹興五年以恩補  
官魏了翁薦知衡陽縣多善政見浙江通志題名稱字曰困

衢因古文淵衢古文道姓名與字俱合似卽一人惟據金石萃編以祁塵爲號則王淦當爲湖北之襄陽人並非浙江之臨海人又紹興五年至嘉熙二年相距百餘年時代亦不合豈浙江通志所載有誤或月是一人歟

曾宏正浯谿詩

曾宏正題浯谿詩行書十五行在浯谿厓石攷宏正乃直隴圖閣諡忠節曾三聘之子三聘宋史有傳又廣西臨桂有游侶所撰神道碑係宏正書題銜稱嗣子朝奉  
秘閣廣南西路轉運判官云云又有宏正題隱山詩及水月洞詞皆濠祐二年後有元至正閒曾孫臨桂縣尹天驥跋云先曾祖自宋提點湖南刑獄濠祐癸卯調廣西運使則此濠祐二年壬

頁上曾三不之類列不卷四  
三二  
寅正宏正官湖南提刑時逾年而去任也此刻前人未見

大凌峰鐘款

衡嶽七十二峰古無其說大約起於宋時故南宋陳田夫作南嶽總勝集已列其名與今南嶽志所載又不盡同蓋土人隨時易名原無定證也此鐘文云衡山大凌峰不特不見於陳田夫書卽南嶽志亦無此峰名壬寅乃淳祐二年衡山時隸潭州

林華浯谿詞

右林華詞行書十行不齊在磨厓石壁前人未見亦不合

李曾伯浯谿題名

李曾伯題名正書五行在浯谿厓石攷宋史本傳李曾伯字

長孺覃懷人後居嘉興歷官通判濠州遷軍器監主簿添差  
通判鄂州兼沿江制置副使主管機宜文字遷度支郎官授  
左司郎官淮西總領尋遷右司太府少卿兼左司郎官兼敕  
令所刪修官遷太府卿淮東制置使兼淮西詔軍事便宜行  
之疏奏答天心重地勢協人謀三事又條上諸要務加華文  
閣待制又加寶文閣直學士進權兵部尙書淳祐六年正月  
朔日食應詔上言又請修復泗州城加煥章閣學士言者相  
繼論罷九年以舊職知靜江府廣西經略安撫使兼廣西轉  
運使陳守邊之宜五事進徽猷閣學士荆湖安撫制置使知  
江陵府兼湖廣總領兼京湖屯田使進龍圖閣學士本紀載  
其以徽猷閣學士安撫荆湖於淳祐十年三月此題名刻於



是年夏五十四日蓋正曾伯自廣西移任荆湖道經浯谿時也後又於寶祐中再知靜江今廣西臨桂有曾伯濠祐寶祐開慶景定諸題名可證也明通志謂曾伯於嘉熙間知岳州多善政而不及其安撫荆湖事攷史傳未云知岳州恐誤清湘趙畬夫字俞仲管安昌字順夫亦見臨桂題名據臨桂西山題名有云子杓姪根侍則知此姪下磨滅一字當是根字耳史稱曾伯與賈似道同官閫帥邊事知無不言爲似道所嫉卒不竟其用云此刻前人未見刻兼並四節軍事則宜云

凌攀龍浯谿題名

右凌攀龍題名正書七行在磨厓右厓下米黻題名前三上缺一字浯谿新志作時按長沙本星名見史記天官書厥後

唐張守節正義及甘石星經有長沙一星主人壽命明則人長壽之說故後人遂稱長沙爲星沙亦曰壽沙此題名云壽沙凌攀龍後長沙凌登龍一題名又云星沙凌登龍則知宋人已有是稱矣其云省兄宰浯谿當是後辛亥題名之凌登龍也

凌登龍等浯谿題名

浯谿新志載此題名列於明代末題潭祐辛亥作弘治辛亥攷星沙凌登龍見潭祐辛亥張仲題名春陵周邵虎有潭祐辛亥小憩亭題記並在浯谿弘治辛亥係明孝宗改元之四年事隔三朝又相距二百餘年之久斷無同貫同姓名如此之巧者其爲潭祐辛亥之譌無疑今改正辛亥係潭祐十一

年也余游浯谿搨工偶遺此刻不能一審原文爲憾事

張仲等浯谿題名

右張仲等題名正書六行在磨厓石壁前壽沙凌攀龍題名云因省兄宰浯谿此云長沙凌登龍率邑僚來會則凌登龍當卽凌攀龍之兄而其時宰祁陽者縣志職官表未載

張仲浯谿詩

右張仲詩正書詩四行跋五行字較小在磨厓壁閒前人未見按前題名末云夏至前一日此云夏至後一日後字恐記憶之誤也

周邵虎浯谿小憩亭題記

右小憩亭記行書十六行在磨厓左右壁下前人未見文中

所云河內李公卽前李曾伯也曾伯自廣西經略安撫使移任荆湖安撫使知江陵府此云由桂帥制京湖不云荆湖而云京湖者曾伯是時又兼京湖屯田使也京湖者京西湖北二路也

楊瑾浯谿題名

右楊瑾題名正書六行在磨厓右石上前三行下沒土中字不可見前人未載

虞珪和韻詩

右刻在永州府學虞珪之珪說文解字訓極巧視之也从四工廣韻上聲二十八獮知演切又視戰切解與說文同展字从此字得聲也前浯谿張仲題名云丞郡二水此題名又云

假守二水二水或以楷書永字拆開言之或因後人謂瀟湘  
二水至永州湘口合流言之亦未可定攷水經注但言湘水  
並無所謂瀟水古瀟字作瀟玉篇始作瀟說文云瀟清深也  
廣韻入聲瀟下云深清也酈道元水經注瀟湘之浦下亦云  
瀟者水清深也廣雅云瀟清也高郵王給諫念孫疏證又引  
湘中記曰湘水清照五六丈是緝瀟湘之名矣是瀟湘之瀟  
取清深之義後人以瀟湘爲二水者非余按廣韻平聲瀟下  
云水名又唐柳子厚愚谿詩序云灌水之陽有谿焉東入於  
瀟水又云余以愚觸罪謫瀟水上蓋以瀟湘爲二水名實始  
於唐至宋祝穆方輿勝覽遂有瀟水出九疑山之說自後瀟  
湘並稱無有知其非者矣

黔陽縣登科題名碑

右僻舉巖黔陽縣登科題名碑篆額三行行三字在黔陽縣  
學明倫堂庭東壁間上截刻記文正書廿四行下截止題舒  
夢桂三字姓名以後空石爲元至正間人續刻詩於上玩記  
文語氣似以則自有郡庠鴈塔在爲一句末行以郡庠臺頭  
前行自有下似當空今石刻前行下有郡字行末又有甲  
寅二字中間似有數字已磨去不可辨或係當時磨改或後  
人所爲俱未可知

王壺浯谿詩

右王壺詩正書存十行在磨厓石壁首行一句爲後人磨去  
改刻此刻前人未見

莊密節丁叔巖悟谿詩

右莊密節丁叔巖詩草書十四行在磨厓壁間前人未見珩

古文寶

楊惔悟谿題名

右楊惔題名正書四行在磨厓巔悟臺之左前人未見宋史有楊惔傳初爲孟珙幕僚後登第以戰功升三官得心疾曾任潭州節度推官然其名从才又云臨州人未知是否

楊惔悟谿殘題名

右楊惔歸舟殘題名在余靖題名右前半及下俱爲明人磨去改刻止存二行六字正書前人未見

鍾有大澹山巖題名

俞計院當卽後浯谿仲春題名之俞揆也宋時有審計院設  
官專司會計錢穀出入俞揆蓋由審計院官出爲荆南提刑  
故有計院之稱鍾有大零陵縣志職官未載

俞揆趙與儻浯谿詩

俞揆趙與儻詩共十四行正書前後大小不齊在浯谿厓上  
攷與儻乃集慶軍節度觀察留後南康郡公惟能之七世孫  
秦王德芳之後見宋史宗室世系表此刻前人未見其云憲  
節行部前鍾有大澹山巖題名云繡使俞計院則揆必荆南  
提點刑獄之官而志皆不載趙與儻自署其官曰檢法攷宋  
制提刑有檢法官一員則與儻乃揆之屬官而隨行者也故  
有幸侍輜車之語



文有年溥谿詩

右文有年詩正書九行在磨厓壁上前人未見

御書濂谿書院額并表記碑

景定御書道州濂谿書院額碑在道州濂谿書院前碑亭中  
中篆額皇帝御書四字作二行下刻道州濂谿書院六大字  
字徑尺餘正書作二行行中書緝熙殿書四字亦正書字徑  
寸許字上鈐一印文曰御書之寶其上又有壬戌二字兩圖  
章方寸餘六大字之後小正書一行云濂谿書院掌御書臣  
李挺祖恭摹并篆額其下一截刻知道州楊允恭謝表四十  
四行又下一截刻允恭建御書閣及新祠字記四十二行皆  
小正書周元公晚以疾求知南康軍因家廬山蓮華峰下前

有谿合於湓江取營道所居濂谿以名之後人勅書院於其地遂名濂谿書院道州書院之名亦曰濂谿故允恭表文云念書院之興凡歷幾載何御扁之錫獨一九江又記文云用能再立人祚重開庚申循環之運者理宗以開慶二年庚申改景定與宋太祖建隆元年太歲干支同也宋初朝臣出守列郡號權知軍州事逮後止稱知某州事無權字矣此允恭題銜又云差權知道州軍州蓋又南宋末年之制也沿邊谿崗都巡檢本武職宋制沿邊州郡卽兼此官故允恭銜稱充管界沿邊谿崗都巡檢使又云借緋者宋制連率職司節鎮支郡倅貳服色未至而應假借者服紫止曰借紫服緋止曰借緋又云兼管內勸農營田事者乃南宋紹興以後之制也

唐設度支營田使宋之營田時因兵火後民多失業官爲募人耕之量收租利初以鎮撫宣撫等使兼營田官紹興七年更令以監司兼領見繫年要錄監司者節度以下觀察團練等使也宋以其事歸於知軍州故以知軍州兼其事又真宗天禧中詔諸路提點刑獄加勸農使南宋以後蓋亦以知州兼其事故提刑無勸農使之銜矣李挺祖江華人卽前書九疑山銘者自稱濂谿書院掌御書臣此官不經見恐卽知州所辟未必出自朝命也道州新志謂允恭長沙人景定二年以太學博士兼國子博士出知道州治狀有聞後擢廣東提刑宋史有楊允恭傳係宋初人官武職卒於真宗咸平二年此又一人也

漢九疑山碑

右九疑山銘漢蔡邕撰宋李挺祖八分書李襲之刻在九疑山玉瑄巖之左中郎此銘歐趙洪諸家書俱未著錄當時不知曾否勒石今惟見於歐陽率更藝文類聚中寧遠縣志曾載李襲之於寓賢云潼州人謁舜廟有碑記今讀其跋云襲之既考新宮遂屬郡人李挺祖書於玉瑄巖則襲之似嘗修建舜廟有政績者矣縣治名宦當爲列傳其謁舜廟碑文志亦未錄李挺祖書取法漢隸結構有體在宋人中已不可多得而縣志亦無傳其事蹟不可攷

桃洞流香四字又洞陽仙境四字

凳字俗書以爲木器桌凳字於字書無攷此近代市井閒所

用不經之字也余謂糜斃恐是糜斃之誤糜斃係我吳人王  
鏊姑蘇志有傳云糜氏在宋時爲吳中大姓其先本胸山人  
建炎中始徙吳斃祖名師旦紹興中進士歷官顯謨閣學士  
父溧亦登慶元元年進士仕至祕閣修撰斃字伯升以師旦  
郊恩補將仕郎端平初出監無爲軍襄安鎮嘉熙二年射策  
登進士第差行在豐儲西倉譏察官淳祐初北兵至通州斃  
條陳五事知長興縣改來安縣充淮西安撫機宜轉朝散大  
夫差知廉州未行改安慶府又改無爲軍開慶初除將作監  
丞沿江宣撫司參議官差知處州改安慶府景定初疏法堯  
舜十二事詔獎納之在官四年境有嘉穀之瑞民爲立生祠  
轉朝議大夫封吳縣開國男卒年七十七據此知斃於端平

初始出仕安得先於嘉定中守邵州嘉定當是景定之譌今  
改正寶慶府志既於桃花洞下云嘉定中郡守糜堯又於職  
官列糜堯於靖康間姓字已彼此繆異時代又復前後矛盾  
且不攷其籍貫歷官皆作志者之疏也彝卽登字說文作彝  
云籀文登玉篇云堯古文登

古雲根三字

此古雲根三字旁題景定甲子上巳郡守中吳等字而缺其  
名據志謂桃花洞又有桃洞流香洞陽仙境等字俱郡守糜  
彝題而云嘉定中余既據姑蘇志辨正糜堯爲糜彝之譌并  
疑嘉定當是景定苦無確證今按此刻云景定又云中吳必  
是彝同時所題而前之誤糜堯爲糜彝景定爲嘉定更無可

疑矣甲子乃景定五年姑蘇志糜糞傳末但云改安慶府景  
定初疏上法堯舜十二事及在官四年境有嘉穀之瑞民爲  
立生祠而不及守寶慶事漏也據此可以補之

劉錫浯谿詩

右劉錫詩行書七行在磨厓石壁前人未見

文子璋浯谿詩

右文子璋詩正書十行在柳明明大押字之左前人未見

杭一民澹山巖題名

澹山巖有杭一民題名正書三行

秦少游蹋莎行詞

右秦少游詞米元章行書十一行行八字在郴州下載爲咸

潭二年二月郴州守鄒恣跋十三行行十字正書乃記刻此詞之本末也攷黃山谷有跋秦少游躡莎行卽此詞也云右少游發郴州回橫州多顧有所屬而作語意極妙似劉夢得楚蜀閒詩也又冷齋夜語云少游到郴州作長短句云云東坡絕愛其尾兩句自書於扇曰少游已矣雖萬人何贖今以石刻校兩家所引詞句有不同處如知何處作無尋處殘陽樹作斜陽暮又郴江本自繞郴山之本作幸似皆當以石刻爲正然據漁隱叢話引詩眼謂淮海小詞云杜鵑聲裏斜陽暮山谷曰此詞高絕但旣云斜陽又云暮則重出也欲改斜陽作簾櫳余曰旣言孤館閉春寒似無簾櫳公曰亭傳雖未必有簾櫳有亦無害余曰此詞本模寫牢落之狀若曰簾櫳



恐損初意先生曰極難得好字當徐思之云云則此句似經  
後人改定者豈卽出於元章之手邪又攷周益公有跋米元  
章書秦少游詞云借眼前之景而含萬里不盡之情因古人  
之法而得三昧自在之力此詞此字所以傳世似亦卽指此  
刻而言也郴州總志云鄒恭咸淳元年由奉直大夫知郴州  
而不著其籍貫據此刻知爲邵武人

楊履順等浯谿題名

右楊履順題名行書五行在磨厓左壁浯谿新志廬誤作零  
門誤作南脫孫字來誤作永益誤作如

李祐孫浯谿詩

李祐孫詩正書十行後又有行書三行字較小似別是一人

之詩敘而詩已爲後人磨去并不知姓名矣在磨厓左壁前人未見

江瓊浯谿詩

右江瓊詩刻行書十行字多漫漶在磨厓左壁浯谿志輪雲誤作浮雲老生誤作老成

王善巖題刻

躬字想卽已字而加身旁字書所未見想當時俚俗所用之字也

樂炎發等浯谿題名

右樂炎發等題名行書三行在柳明明心記右劉錫題名下題云漳午冬想卽前高不儔題名漳八戍之類也攷宋代以

淳化五年甲午淳熙元年甲午十三年丙午淳祐六年丙午咸淳六年庚午此未知何屬此類文法蓋始於南宋末年此題名非淳祐當卽咸淳姑附於此前人未見

咸淳辛未浯谿殘題名

右咸淳辛未殘題名在文子璋詩前正書前後二行俱磨滅僅存此二行可辨前人未見

唐復浯谿題名

右唐復題名正書六行在磨厓右厓下浯谿新志蔣棟琴軒四字誤作蔣康琴三字真正誤作眞玉

趙孟疏浯谿題名

趙孟疏題名八行行書在浯谿磨厓下攷孟疏爲楚國公七

世孫朝散郎令壽之五世孫乃燕王德昭之後見宋史宗室  
世系表浯谿新志孟誤作益無任祁二字進士下作趙一夔  
同來五字揖誤作挹

紀呂洞賓事迹碑

方輿勝覽云呂巖客字洞賓河中府人唐禮部侍郎渭之孫  
會昌中兩舉進士不第去游廬山遇異人得長生訣多游湘  
潭岳鄂之間人莫之識岳陽風土記謂岳陽樓上有呂先生  
留題石刻云朝游北粵暮蒼梧袖有青蛇膽氣羸三入岳陽  
人不識朗吟飛過洞庭湖據張舜民南遷錄載岳陽樓李觀  
紀呂洞賓事迹碑一詩獨自行兮獨自坐云云又非卽此詩  
豈舜民所云云二絕句者其一卽朝游北粵之絕句邪全唐

詩以風土記所引一首列之無題諸絕句中而南遷錄一首  
題云閒題俱不相合未知本自何書全唐詩北粵作北越袖  
有作袖裏獨自行兮作獨自行來

鄭璪題名

攷明成化諸司衙門官制綏寧縣青坡巡檢司清波作青坡  
又重修官制作青陂攷祝穆方輿勝覽青陂湖在會同縣則  
清波當作清陂爲正靖州志謂鄭璪以奉議郎知靖州據明  
統志當作靖州通判

前知永州浯谿殘題名

右前知永州殘題名正書七行左行在元祐孫欽臣題名前  
文多漫漶不可辨按其所署官爵乃南宋以前制也前人未

見

趙崇■等浯谿題名

趙崇■等殘題名四行正書在浯谿厓石上已磨滅亦不見年月按其人姓名排行知爲宋刻攷宋史宗室世系表魏王廷美後之九世皆以時字排行十世以若字排行表有兩時進皆鄭國公德鈞之後一爲懋夫子一爲堉夫子下皆不見若持名未知孰是此刻前人未見

趙次翁浯谿題名

右趙次翁題名八分書在磨厓壁閒漫漶不全止在四行似宋人手筆也前人未見

東都■石鼓山題刻

西谿有行書題刻十餘行行約五六字字徑二寸許殘蝕難辨可識者第六行有湘蒸之會及後東都等數字耳當是宋人所題江徇清泉縣志失載

王<sub>■</sub>等麓山寺碑陰題名

右題名正書六行在李北海碑陰第三截左下似是宋刻

蘇大忠浯谿題名

右蘇大忠題名正書四行在磨厓右厓下大書深刻似宋人

筆山上所缺必是眉字蓋三蘇之族人也此刻前人未見

嚴應卯等浯谿題名

右刻在柳明明心記大押字左其前爲後人磨去改刻止存

此行紀年無攷似是宋刻前人未見

叔權浯谿殘題名

右刻在至元三十年李燕■題名前八分書其前與上俱磨去僅存此四字二行當是宋人所題前人未見

浯谿殘詩刻

右刻在牟希元題名後正書十一行左行文多漫漶不見年號名姓似是宋刻前人未著錄

陳安道石鼓山詩

石鼓之西谿厓間有石刻詩十一行正書字徑寸二三分漫漶不可卒讀惟首二行近看安知石鼓■遠觀方十餘字及末行陳安道等字似其人之姓名尚可辨而江柎清泉縣志遺之雖未見年月的是宋人手筆前人未錄



金

正大二年提控印

金正大二年提控印以今裁縫尺度之方寸八分以市稱權之重十八兩文曰提空之印旁有款識右云正大二年十月日■左云大名行部造上云副提控印與劉昌懸笥瑣探所記天興二印式正合彼云行宮禮部造此云大名行部造者案金史大名府路貞祐二年置行尚書省此印蓋卽行省所鑄也大金集禮載三師三公親王尚書令並金印王及諸郡王三師宰執一品官並用銀鑄金鍍二品印銅鑄金鍍三品以下皆止用銅鑄溶審此印銅鑄無金鍍蓋三品以下官之印也攷金之提控皆虛銜實無專官百官志有提控銜者甚

多印文止云提控莫能定爲何官其款識云副提控印則此  
印實提控之副使所用有提控銜之副使類多六品以下官  
所用者大金集禮載其制度金印方二寸王之銀印方寸七  
分以下依次遞減至六品印止方寸三分重十六兩今以權  
度較之其重強二兩其方強五分較王印已過一分制多不  
合然懸笥瑣探所記兩印一爲尙書戶部郎中乃從五品一  
爲宣差副總領乃從六品皆方二寸許又予見雲閒汪氏藏  
興定提控所菜字印以今尺度之亦方二寸強可知金之權  
度較大於今且又時有變更未可以疑之也印爲予友吳  
袁君綬階所得出以示予因假歸手印數紙并搨其款識略  
攷顛末書予所見以復之時嘉慶二年二月十八日瞿中溶

記

元

潭州路銅權

曩在吳門舊肆得銅權一高三寸強博寸七分厚六分形製六稜上有方鈕下平足一面潭州二字一面路造二字皆陰款己卯二月於長沙市又得一權形製大小略同二面文同前權其兩面左右次第刻云至元二十一年丁亦皆陰款銅權勒文昉於嬴秦其文載宋人鐘鼎款識博古圖諸書此元權勒路名年號殆亦當時之制由官鑄給者歟其一面勒一丁字者蓋所編字號也余所見元權甚多往往如此又攷元至元十四年立行省改潭州爲潭州路至文宗天歷二年以

後則又改稱天臨路矣

李燕 ■ 浯谿題名

右刻在東厓右浯谿新志十月作十一月北作此上有到字  
燕下作蒙書二字

史杠石鼓山題名

右題名正書四行左行字徑寸餘在西谿太和題名左

衡陽縣主簿郭 缺 石鼓山題刻

衡陽主簿郭某題記正書十一行上下多磨滅每行約十五  
六字字徑六七分在石鼓山西谿厓上似記本路分司判官  
等修葺石鼓書院及棚亭之事也江恂清泉縣志未收成宗  
卽位建元元貞丙申乃二年也

杜明浯谿詩

右刻杜明浯詩正書七行在磨厓左壁

大德九年石鼓山殘題名

右題名三行正書字徑寸三四分在石鼓山西谿寶祐二年震孫題名之前後已殘缺未見姓名江氏清泉縣志亦失載讀其文義似是元貞中先有題記者今未見

史柱浯谿題名

右史柱浯谿題名正書四行從公以下二行微小在湘中紀

行詩後

史燾石鼓山題名

右史燾題名正書四行在西谿元貞題名左文云拜觀舊題

當卽指前元貞史枉題名言之則燾必枉之子矣攷圖繪寶鑑云史枉號橋齋道州人官右丞今據題名則橋齋乃燾之氏非枉也

瀏陽州蒙古教授印

乾隆閒有人於土中掘得舊銅官印一方背有大德年號其文係蒙古國書或以印本質余外舅錢少詹譯其文曰瀏陽州蒙古教授印後以印本貽余印方寸八分作三行前二行皆三字後行二字攷元史瀏陽州屬潭州路舊爲縣元貞元年升爲中州元制路府皆設儒學教授一員學正學錄各一員蒙古教授一員諸州上中州設教授一員下州設學正一員史不言諸州有蒙古教授據此印則知中州亦設蒙

古教授矣可以補史志所未詳

洞元觀鐘文

右延祐六年鐘銘文正書三十六行行十二字在興寧縣

鄭友直浯谿題名

右延祐八年鄭友直題名正書五行在浯谿厓下

姚紱浯谿詩

右姚紱浯谿詩正書九行紱時官肅政廉訪使按部過邗陽而題也在厓臺在厓上前人未見

姚紱再題浯谿詩

右姚紱再題浯谿詩正書十行在浯谿口厓上前人未見

至元後丁丑浯谿殘詩刻

右後至元浯谿殘詩行書九行在磨厓壁右半沒於土中僅見上截書法頗似趙子昂是學趙者前人未見按寰宇訪碑錄有題中興頌詩燕莫白撰正書後至元三年未知卽此刻否

陶福之鑿石砌路記

右陶福之記正書九行在長沙縣西六十里烏山洞至正無己酉乃乙酉之譌也

朱守諒秋夜偶成詩刻

右刻正書廿三行卽刻於寶祐題名碑下截舒夢桂姓名之後在黔陽縣學

兪憲周公游朝陽巖題名



石泉山館金石文編卷之四  
周從進游朝陽巖題名正書九行

澧州路銅權文

辛未夏五於長沙市買得銅權形勢大小與前潭州路權略  
同一面有澧州路三字一面有至正年字其左右似皆  
有蒙古字皆陽款攷澧州亦於至元十四年改爲澧州路

古泉山館金石文編殘稿卷四

古泉山館金石萃編殘彙瞿中溶木夫撰木夫漢石經考異  
二卷刻入叢書甲集此書亦木夫所著共百六十卷彙成未  
刻藏鎮洋陸莘農觀察所潘文勤公在京師借閱並許爲開  
雕觀察專人送至京師以卷褻繁重未能如約觀察復專人  
取歸行至洞庭湖舟覆書遂湮沒嘉慶時楚南修通志木夫  
專修金石一門載入數十篇陸邵聞之續金石萃編陸觀察  
之八瓊室金石記亦多采取因并金石搨本跋語亦彙入之  
摘錄成帙編成四卷付刻以傳木夫所著自刊最少近年譜  
刻入嘉業堂叢書書跋刻入藕香零拾文集刻入煙畫東堂  
叢書似亦可稍慰平生苦志矣木夫前得漢五銖錢一由擬  
結成形名之曰古泉山遂爲館名歲在柔兆執徐相月吳興

張鈞衡跋

之曰古風山張鈞衡跋

張鈞衡跋

張鈞衡跋

張鈞衡跋

張鈞衡跋

張鈞衡跋

張鈞衡跋

張鈞衡跋

張鈞衡跋

張鈞衡跋

張鈞衡跋